

東江詩鈔

東江詩鈔 (清) 唐孫華撰

上海古籍出版社出版

(上海福州路五號)

上海市印刷七廠印刷

各埠書店上海發行所發行

各地書店經售

一九七九年十二月第一版

一九七九年十二月第一次印刷

開本：六一〇乘一三七二毫米十二分之一

印張：四十五又六分之五 印數：一六〇〇部

統一書號：一〇一八六·二四七 全三冊 線裝 定價：十五元

東江詩鈔卷第八

太倉唐孫華實君橐

受業  
歸巢雲編

抱灌軒雜興

野岸青蕪合茅齋白日長  
草深難覓路樹密不成行  
枝  
憂風鳴竹檐虛雨入廊  
衰年疲應接只合老江鄉  
鄰圃遙相接虛亭衆綠圍  
櫻桃時正熟豆莢雨初肥  
徑僻通來往村間少是非  
過從多野老坐對語忘機

連雨

黑雲蔽曾穹急雨駭滿澗  
金鴉濕不翔纖阿逝安適  
冥冥失昏曉淙淙竟日夕  
貧突斷炊煙陋巷少行跡  
平陸

身言金卷八  
一  
將行舟階除但響屐漂搖杜陵茅狼籍文通麥潮連海  
氣黃風捲浪花白膏潤由彼蒼母乃濫恩澤跳舞恣魚  
鰕呼鳴沸蠹蠅豈知隴畔夫隱憂在墊溺頗聞淮北旱  
阪田欲龜坼吾鄉本沮洳百川愁汎溢宜使挹注均彼  
此遂畊穫天意知如何默默坐歎息

玫瑰

和友人詩

籬落尋常種瓊瑰浪得名聞香甘醞蜜駐色擣和飴避  
刺褰衣摘眠鬟壓枕輕偏宜閨閣愛兒女最留情

鮒魚

聲價伊鮒重似鮒魚江鄉薦味新取腴餐耐骨惜美煮兼  
鱗防餒冰花護遮頭柳葉勻家家石首饜此物尚稱珍

麥蠶

夏穉將成候蠕蠕綠滿匙色鮮如乍浴縷細欲抽絲軟  
喜登盤早纖疑上箔遲甸人初獻麥正是采桑時

夏日小雨

生平畏炎夏晝長不可度赤燂有張弛涼颼生遠樹清  
雲時往來斜陽照疎雨颯然如已秋輕扇屏紋素茗粥  
幸麓供餘事非所慕展書竟忘疲賞心時一遇徐起視  
庭陰黯黯日將暮

輓錢再亭京兆

清卿才譽重巖廊京尹丰稜比趙張三輔移風傳約束  
四方動色誦封章活人共賴黔敖粥濟物思開汲黯倉

知有遺民修巷祭富春江畔是桐鄉

曾爲富陽令

育嬰堂得一女軒渠笑悅秀慧可喜葛韋齋廣文見而異之因撫之爲女賀之以詩

眉眼清妍骨相殊采芝何必問根株乍離葦篋驚頭玉才脫泥塗即掌珠弱女先教娛靖節多男行復慰商瞿投懷一笑由天合拾取嬌凰引鳳雛

輓王南湖郡丞

軒然玉立出人群富貴俄看過眼雲礪難平肝膽在交游雖雜品流分常情豈盡祛三惑正氣終能壯一軍阿鶩悲啼兒女泣重泉何路遣相聞

籠霄勝氣亘長虹共許他年位望通材比淵阿鋒太甚

胸無城府物旋融一官跋涉翻成病萬事縈纏不悟空  
蕉鹿早知宵夢短驪駒何苦別恩恩

次和酬愷功院長見懷一百韻

咳唾天邊落音書野外遲瑤華煩遠寄瓊樹最相思避  
世東方朔忘形南郭綦功名成昔夢欄笏散兒嬉研席  
思歡聚篇章互贈貽灰心吾兀兀勤業爾孜孜斐几同  
攤卷甘泉共酌蠡勝流宗北海高會集南皮字做鵝群  
帖文成雞卵碑見晉書戴逵傳六經裁衆說三史析群疑上相  
推門第周廬豈職司紛華捐嗜好理義問津涯目訝連  
行下辭非倩手為風謠窮正變體製辨淳漓威鳳終摩  
漢神駒不受羈名園對掩曖曲沼蕩淪漪神美如新柳

心舒異卷施無慚鄴下作誰數蔡家兒英利初研刃聰  
明脫穎錐朱絃流逸響白壁絕微疵觸長真吾友因心  
不待師挾輶君自壯菟乘我先疲未厭侯羸老能容懷  
祖癡堆槃珍果美稱體紵衣宜精鏹時分給華鏹許借  
騎才應趨鶴禁賦合奏龍池地迴星辰逼天垂雨露滋  
暫時聊隱豹暇日共聽鷗異敏通淵照微長取管窺西  
山招翠靄南陌接逶迤自愛興居適何愁寒暑移雜花  
翻煖豔遠樹送涼颼爽夕聞清籟暗檐曝晚曦轉胞慵  
數起斂手未停披倦讀嘗燒髮劉孝標事微吟每斷髭耽書  
真帶癖鬪韻比爭碁幸有梁園樂都忘越客悲荀郎誇  
少貴洗馬羨風姿室藹芝蘭氣家傳孝友規爐煙縈甲



煎硯匣暎琉璃燕坐如齋肅寘筵厭舞傲誰汙江敷榻  
常閉董生帷牕靜嵐光入林踈月影篩拂箋鋪淨滑搖  
管散英蕤源本揆周雅芬香擷楚詞文瀾驚滉漾墨浪  
注灑澌閣用藜燃火廚羞蠟代炊彥昇新有筆近作古文甚佳  
康樂久稱詩君喜先鳴早余慚再鼓衰每聞頻換綬無  
復共銜卮雲罕時陪從星輶數載馳涼陘張毳幕絕漠  
度駮驪馬邑銷殘壘龍庭訪故祠鑿氷充茗飲梯木陟  
高危莫憚勤勞慣仍誇際遇竒遲歸分禁燭宣 召趣  
金羈造膝依丹地承恩上赤墀金鑿居首席玉笋競肩  
隨自愧孤生竹難縑獨繭絲苑枯根種別升墜道塗岐  
拂袖辭閭闔還家臥水湄僕僮嫌欲去僚友棄如遺挂

誤緣疎拙咨詢荷

聖慈

曾蒙語垂問

天

始知登仕路終是

藉門基烏鵲徒三匝鷓鴣但一枝玉沉同瓦礫荃化委

茅茨屋借藤蘿補牀將錦石支悠悠常若此惘惘欲何

之持斧因芟樹腰鎌為刈葵歸田事農扈擊壤頌伊祁

華茂看榮木蕭條賦病梨齒從前日落髡異昔年緇軒

冕誠何有林苻偶自怡罷官閒亦得懷友見無期白簞

供高枕青松挂接籬任教藜榻做休乞草堂資詹尹方

端策文君早遇著

文君為我端著見張平子賦

恩淡瞻北闕身遠落

南陔歲歉逢淫潦塗窮即險巖

江南大水田皆漂沒

陌頭驅轂鯨

簷畔聽芻尼

藏經呼喜鵲為芻尼

稻壟連河沒葭牆帶戶敲寢驚

愁壓溺室小厭喧早日出江雲翳風狂海浪吹懶擡看

世眼常蹙向隅眉羽扇三秋氣羊裘五月時

五月甚寒

文難

通狗監友欲訪牛醫衣帶頻年緩形容逐歲虧清狂疎

禮法褰袒闕威儀頗戀桃笙穩行煩竹杖持徵求貧到

骨關鬲冷侵脾良會曾交臂微言各解頤未隨劉尹舫

劉惔遇張憑便與同載至都

空盼陸郎騅寵渥人誰並文章世共推

近聞星使節遠至下句麗

高麗曾改名下麗句麗見漢書

不羨金如粟

居然橐竟垂

聞郤高麗餽物

山川雲縹渺鵬鷁影參差老欲謀

魚麥飢難問肉糜采蕭嗟久別贈藥感將離舊客存枚

乘新篇愛項斯索居無善狀聊報故人知

附錄原倡

高麗使館中作

揆叙

持節朱蒙遠停車白日遲恒牽行客夢彌軫哲人思

自昔陪歡賞終年接履綦晨昏勤砥礪寒暑共娛嬉  
經向窗前授書從帳裏貽藝林頻矻矻藻苑競孜孜  
敢冀升堂與惟期測管蠡裙新書白練几淨拭烏皮  
泛覽周南史流觀洛下碑陳編容蠹蝕竒字質狐疑  
淹博推劉杳清華替左司文峰高莫竝學海浩無涯  
撰述嘉名著詞章餘事為敲銅元敏捷染翰獨淋漓  
巧類衣無縫豪踰馬不羈繁英爭爛熳曲沼映漣漪  
逸韻飄蘭蕙詞場埽蒺藜靈均堪命僕德祖合稱兒  
自愧頑如石淡慙利若錐雙聲糾錯繆八病指瑕疵  
曾勉三冬學非同一字師微哦先失喜雜誦竟忘疲  
娛我如黃妳從人笑白癡城闈情已適郊墅興偏宜

紫陌常偕出金鞍每並騎尋芳穿小徑被袂向通池  
柳借和風軟花含宿雨滋班荆依碧草把酒聽黃鸝  
船度魚知避窗開鶴解窺韶華仍澹沲麗景漸逶迤  
席爲臨流設牀因選樹移西山招爽氣北牖納涼颺  
素節回招矩朱炎謝赫曦梧桐陰錯落菡萏影敷披  
延客開青眼謂他山師留僧對赤顏謂輪菴升沉嘖響卜得  
失陋圍碁排日翻嫌短逢秋不解悲菊花呈晚態楓  
葉鬪妍姿玉瑄專調氣銀蟾正滿規畦收紅穉棖池  
靨碧琉璃都入連宵咏還容屢舞傲沍陰纔應律朔  
氣忽侵帷靨黷雲如纈續紛雪似篩庭空鋪木屑瓦  
冷聚璇甍彷彿王維畫依稀謝女詞林凋封直榦河

凍咽流澌燈熬魚油暗爐添獸炭炊試揮鏤管筆同  
和聚星詩白戰才偏健清吟興未衰迎年齊聽鼓守  
歲共操卮冉冉星霜換騰騰節序馳歡情方狎鷺別  
緒遽歌驪路指滕王閣途經孝肅祠鞋山形峭拔湓  
浦浪驚危懸水窺三疊層峰問九竒搜羅歸卷帙登  
覽忘孤羈再入青門市還登白玉墀銓曹推簡要翰  
苑許追隨每待宮中漏仍封閣上絲班聯方接武行  
役又臨岐判袂燕臺畔持衡浙水湄冰壺人盡仰玉  
尺士無遺步屨尋靈隱肩輿訪淨慈六橋徵故事三  
竺訊遺基夜月潮千丈秋風桂幾枝微官拋組綬初  
服返茅茨閣小迎陽啓廊空倩石支歸田效平子誓

墓比羲之家種王猷竹園滋鮑照葵朝盤堆首蓓夕  
膳煑黎祁沼畔青荷葉枝頭紫爛黎江湖娛釣弋京  
洛厭塵緇好事憑誰過繙書祇自怡五車侔惠子三  
臘辦家資辛苦惟嘗蓼窮通豈問著高情棲里閨別  
路向邊陲水涉窮沿湖山行歷嶮巖草枯愁朴渥月  
黑喚伊尼委霰裘偏薄迎風帽屢敲雲深藏日暗嶺  
峻逼天卑羶覆穹廬重聲哀鬻策吹有沙皆眯目無  
處可伸眉形隔三千里心懸十二時自嗟身是患翻  
悔俗難醫江闊魚書斷天長雁帛虧兩因叨扈從重  
得覩光儀宿好樽前洽新篇意外持鶯花娛耳目冰

雪沁肝脾接席歡，携手聯牀笑脫顛。  
含情迴盡舫何計，駐班騅返轡春光暮。  
巖裝夏令推，逡巡辭易水。迢遞涉高麗，山接金郊秀。  
泉凝玉溜垂，清川波浩渺。松岳勢參差，歷境增聞見。  
祛煩乏茗糜，舊遊多撥觸。昨夢轉迷離，隔闊還如此。  
淹留獨在斯，新羅與茂苑。兩地不相知。

秋日酷暑焦旱偶成

執熱何時休，延首望西顛。如何秋序至，金弱火彌燥。  
零雨無涓滴，百物盡枯槁。刺體憎結莞，流汗怯織縞。  
竒峰散層雲，長河涸水草。有時雷殷殷，俄變日杲杲。  
土龍竟無靈，空煩舞雩禱。人事安所施，吁嗟仰蒼昊。



初夏苦淫霖百川漲皆滿窪田成通渠漂沒不可算及  
茲兩月晴臯壤焦禾稈游雲不遮日燄燄張火繖招矩  
怯不前赤燠氣轉悍人作毫烏謔苗如吳髮短餓死亦  
尋常炊煙幸未斷那將方寸心愁水復愁旱

皇天無膏澤何有地上毛桔槔喧晝夜念此農夫勞火  
雲時往來炎風烈如燒閨中有病婦咄嗟相煎熬我命  
當孤窮隨逐得汝曹俯仰迫身世內熱增鬱陶室家實  
杻械拳梏安能逃思欲棄妻子汗漫從盧敖

吾嘗聞月令七月來涼風及茲七月杪蘊隆益蟲蟲川  
渠斷舟楫良田沒蒿蓬愧非東先生無由格蒼穹朝驚  
初日赤暮見鮮霞紅微軀恐銷鑠將爲大冶銅所憂蒸

病骨豈獨愁三農安得費長房一喚葛陂龍

秋日集興福禪院

近郭通禪徑疎林帶寺橋  
谿風吹客髯茗鼎沸僧寮  
已許炊香積兼容挈酒瓢

萬園携酒至

我來非聽法詩句問參

寥

久負支郎約今來竹院遊  
薄雲村樹暝落葉寺門秋  
禪悟通風雅清才遇釋流  
文章留一老欲訪白蘋洲

謂賞洲先

孟冬集懷雪堂各咏一物分得衲

世界藏鍼孔

見東坡磨衲贊

寬裁稱體宜禪關和雪擁山路帶

雲披寒重煩裝絮塵空不染緇  
紅樓方競逐休羨紫衣

師東南名縉方馳騫京輦並  
覲承恩故有落句之諷

誄徐贇洲侍郎

東南山水推吳興重巒迴複湖光澄孕奇鍾秀異人出  
詞華哲匠多精能先生崛起持文柄下視沈約羞徐陵  
玉堂制作須巨手辟雍講席臯比登鎖院掄材秉藻鑑  
英賢濟濟同時升姜查二子名久宿西溟他山與我向作忘  
形朋數奇一旦遇知已翻然如掣韝中鷹好友遭逢等  
身受使我意氣皆飛騰拔奇一二勝千百胡然白壁來  
蒼蠅二子詩文我所畏韓門籍湜由師承如公絕學豈  
易得蘭臺玉局職所應况今史事久未就非公鴻筆誰  
能勝餐錢果餅日糜費深恐天闕殘谿藤惜公高卧滄

江側蕭閒徒飽苔溪菱令子鑾坡幸接武班劉家學還  
相仍禁近回翔負公望歸院常撤金蓮燈公年八十正  
強健煙霞鶴骨猶峻嶒華宗別挺緇林秀行高不羨紅  
樓僧偶然駐錫到敝邑微言坐對開昏懵示我新詩屢  
三復瑩如寒玉清如水河東先生得文郁不加譏怪頻  
嗟稱見柳河東辱公詩句遙相憶獨愧輟業耕溝塍宦  
學無成今已老秋髮垂耳頭鬚髻寄語眠餐好自愛當  
今文獻惟公憑欲誚高唱短才力敢以斤鷄追雲鵬

含章上人閉關三年於解關日乞詩

丈室容趺坐蕭然几榻幽鐘魚消旦暮草木變春秋人  
影閒階寂清言隔戶酬定中應得悟星燧已三周

和同年狄向濤太史園居

柳柴

柳塘漫春流徑曲平橋渡山鳥導我前  
花源此得路

詩夢草堂

碎錦何人授詩人一枕清池塘方得句  
啼鳥莫相驚

款竹步

看竹休竟去主人亦復佳  
言詠答清籟竹風與之偕

響臻樓

高樓騁遠目歷歷煙中樹  
書畫任摩挲但勿沾寒具

杏花春雨林亭

杏靨笑春風亦復宜  
絲雨綺態不分明濛濛起紅霧

海棠塢

國色悶深崖見人如欲避銀燈莫漫燒只恐妨花睡

高靜閣

靈媧留墜石宋室想遺忠何事梁朝客奇礪詫到公

花梁

臨水弄新妝天桃如少女橋外立千姝竝在花溪處

櫻桃徑

霏紅亂繁枝交柯行路仄持比鄭櫻桃一種好顏色

漁唱亭

柳港曲通舟溪光蕩斜日時有葦間人延緣唱歌出

題同年狄向濤太史扁舟載花圖

海棠出西川色香雙擅美獨立羣  
藹中凡豔羞紅紫虎丘三月時  
山塘盛花市萬錢索高價過者但  
凝視時流逐近翫捆載收桃李吾  
友性愛花題品貴清綺片帆隨春  
風扁舟杙川汜獨采殊尤姿衆葩  
斥妖靡畫舫映清簾花光蕩流水  
彷彿五湖人一舸載西子有若迎  
莫愁兩槳去迤邐又如羊侶舟羅  
列娉婷妓名花自矜貴不受屠沽  
喜得蒙君子憐花亦感知已豈無  
富豪家園林盛華蕊酒肉一晌歡  
零落委荆杞何殊明妃貌終抱呼  
韓耻花得同君歸水牕弄旖旎蓬  
底半低垂嬌酣呼不起新婦配叅  
軍兩美正相倚花枝置兩頭中間  
列文史嫣然花一笑宛若啓玉齒  
縹緲想仙舟見之圖畫裏

燈簾歌

爲同年秋向  
壽太史賦

西園清夜天無風更籌初下傳霜鐘主人張飲客未醉  
攢枝寶炬珠簾烘翦羅疊玉逞新樣紛紛燈市趨吳儂  
見范石湖  
燈市詞 雖窮雕鏤質脆薄姑蘇製作慚非工何似錦  
堂施設好蠟胎結就光瞳矐大珠小珠玉盤泣燭龍銜  
出鮫人宮巧匠經營金縷細散璣百琲穿玲瓏鳳蠟宵  
長猶未跋錯刀頻剪釵頭蟲十丈遙連雲母障千巡滿  
引琉璃鐘煙靄沉香失庭燎燄搖菡萏羞芙蓉銀蒜垂  
垂波影亂須臾明月升長空燭樹水輪互閃爍姮娥卻  
避星球紅舞衫歌扇燈前出恍惚綃縠花枝蒙遠輝林  
樹妨宿鳥倒射水府愁眠龍翡翠屏開春漠漠珊瑚鈎



捲香濛濛翻愁烏啼天易曙金鴉騰翥虞淵東却晒夏  
侯太寒乞殘妝掩映簾衣中

歲暮餉周礫圃酒米

頽齡畏急景殘歲又將除我貧轉刺促念君復何如朔  
風吹南巷生事日蕭疎老謝扶風帳窮安玉川居索米  
默不應危襟方讀書我有二頃田強半荒菑畬資身誠  
濩落比君似有餘輸官得羨粟斗酒婦所儲聊將持贈  
君不復陳牲魚想當祭竈畢盈杯浮玉蛆陶然致一醉  
萬事眞土苴

乙酉元旦

烏兔天邊迅若飛千門紅帖映朝暉冬温瓦隴霜華薄

歲儉街頭爆竹稀，栢葉杯觴須客到。  
梅花消息待春歸，衰年報謁心情嬾。  
欲取丸泥錮兩扉。

餘年生計老鉏耰，占歲田家訪舊聞。  
絕訝經冬無雨雪，幸看終日有風雲。

史記天官書正月旦欲終日有雨有雲有風有日

光浮蕙草

遲春信凍解蒲根澆，水紋謝客閒牕無箇事。  
一編試手

理殘芸

### 過雙鳳法輪寺訪惟岳師

古寺尋橋入，居然寮宇寬。  
多年材木壞，何日甃塗完。  
香積炊煙冷，荒村乞米難。  
聊持一囊粟，為爾續朝餐。  
戒律知清苦，何能化俗頑。  
榆風吹石徑，竹雨閉禪關。  
謝客仍多忌，為僧尚不閒。  
手栽叢桂好，無使路人攀。

周礫圃家貧年老歲暮刺促州侯茹公以俸錢及酒米相餉礫圃有詩致謝同人竝感高義作詩紀之余亦同賦

趙壹囊空冷爨煙飢腸愁眼逼殘年道州本自能周急

不學陳萇俸錢

陽城官諫議有陳萇者候其得俸輒往稱錢之美月有獲焉

清濁何須仔細分破寒良策賴微醺使君情意濃於酒急起開嘗對馬軍

富室誰分雁鷺糧頒來玉粒晚杭香絕勝飯顛山頭叟升斗朝朝糴太倉

登靈巖有懷館娃宮遺事

浣紗顛顚越溪濱一入吳宮作貴嬪烏喙原無悅已感

蛾眉自戀主恩新玉兒猶殉亡齊節西子寧為賣國人  
莫信鴟夷隨一舸虛疑少伯似巫臣

茹明府招同侍講王麓臺大鴻臚宋堅齋侍御陸  
匪莪太學高槎客飲虎丘梅花樓

巖路驂駢得暫停故人相見眼終青  
宸遊望幸當三

月使節先馳驗二星  
麓臺堅齋皆扈  
蹕奉命先至嵐氣連雲陰敞閣

花枝帶雨照山亭獨憐野老甘疎放泛愛仍容醉醪醺

泊舟惠山下汲泉煮茗

連朝飲河水河水濁如泔舟居無他惡惟此頗不堪曾  
聞虎丘泉泉品推第三昨從劔池過池水黝且藍畏之  
不敢汲恐是蛟龍潭今泊惠山下晴光破朝嵐陟山不

半里石窪見滄涵往來任挹注負重疲丁男而我鷓鼠  
腹少取未為貪餅罌初洗滌聊煩兩夫擔竹爐置船頭  
活火風吹燂須臾入茗椀泉味果清甘石髓出靈液醉  
夢醒昏酣瓢飲固吾分醇醲非所耽安得移茶竈山前  
結茆菴

送吳振西北遊

紛紛輪轂走神京秋卷爭邀月旦評東箭南金誰國士  
畫龍刻鵠半虛名緹藏燕石何人顧光是隨珠始夜明  
望實如君真不愧即看聲譽動公卿

內外家聲尺五天延陵貴胄比秦川王筠風韻同袁祭  
楊暉文章類馬遷抱璞已當三獻後勸行早在十年前

只今決策應非晚乍整蘭筋看著鞭

曳裾文士滿長安未伎鴻都競拜官終待科名方接武  
不由場屋莫彈冠三條檠燭藜光助千佛名經藥榜看  
詞賦逢人休浪擲好留綵筆直金鑾

晨昏顧戀久蹉跎無奈高堂髣髴瞞游子情懷懸問寢  
老人心事重登科音書附舶江南近名士空群冀北多  
但使遄歸看書錦板輿花下樂如何

哭大兄允中

早年失母竝孤嫗辛苦相依共短檠夜帳霜寒牽絮被  
朝廚煙冷待菁羹書籤黃卷窮千軸博士青衫斬一名  
彷彿夢魂懷遠驛瀟瀟風雨對牀聲

衡門兩版謝塵喧和厚天然氣性溫隨俗亦能諧語笑  
逢人未解道寒暄町畦自昔胸無別臧否生平口不言  
沒齒人爭推善士始知用拙道逾尊

文苑名場技有餘晚歸正覺悟三車六時勤禮蓮花座  
五夜頻繙貝葉書議食未嘗除肉味關齋何必定葵蔬  
赤髭緇侶翻堪笑奔走塵埃盡不如

儒術終虛稽古榮譚經絳帳自鏗鏗撐腸文字仍憂餒  
脰脯纖微即代畊歷齒蓬頭慚壯子束芻絮酒荷門生  
白頭兄弟相依切零落田家舊紫荆

有悟

物盛從來勢必衰全家競羨印累累填腸滿膝心何厭

夏言金卷一  
十一  
剽市按牢算不遺早識銅山終應洛何須金塢定營耶  
清風一榻書千卷正是高人嘯詠時

中外謀成三窟憑崢嶸頭角氣驕矜爭門奪隘非無力  
跨海移山取次能專欲任從朝野罵害盈終使鬼神憎  
立身穩處惟廉讓百尺危幢莫漫登

有人贈百瓣荷花三莖云得之嘉定槎谿名西番  
蓮蓋奇種也供膽瓶中老友周礫圃張彤友見而  
異之為賦此詩

吾鄉洲渚多蓮萼翠扇叢中香漠漠卷舒花瓣苦無多  
宛似佳人紅袖薄吳娃傍晚蕩舟回撥觸柔荑半凋落  
埤雅空聞百葉名陸農師埤雅云花之大者至有百葉歷遍陂池何處索



有客攜從南浦來，贈貽珍重比瓊瑰。  
燦霞映日看初吐，抱蕊含香半未開。  
密掩芳心藏苦韻，橫披散綺結重臺。  
層層深護嬌嬈面，簇簇攢成錦繡堆。  
凡種空憐塞沼汙，未落蓮衣見蓮子。  
天寒日暮不成妝，一笑嫣然露齒齣。  
何如奇蘂出殊鄉，百疊芙蓉可製裳。  
埤雅云楚詞芙蓉即今荷花包  
裹却如纏寶祿，周遮全不見鬚房。  
二老來看俱白首，照眼生平得未有。  
藕塘片片落秋風，幾見花開大如斗。  
三株斜插晚牕前，遙想槎溪紅滿川。  
安得聳身凌泰華，一看十丈峰頭蓮。

唁上海李明府

有序

上海李鹿友明府在任三年政聲籍甚予於其初

任時曾一往省之留半日而去自後絕不往見亦  
從無一事請託蓋引分避嫌道宜然也未幾竟以  
清介嫉惡彊直自遂被劾罷官追惟古人有弔失  
位之義乃往一見作詩二章以唁之

三年不到海邊城急浪迴颺觸眼驚砥節久逢劉類怒  
分憂誰作賈彪行避嫌昔自疎官長遇難今仍念友生  
涇渭濁清那可辨留將遺愛付輿評

書生原不合時宜儒術迂踈世共嗤自古上官須善事  
於今廉吏更難爲逢迎未滿親朋意清白徒蒙父老知  
歸去青羶依舊在一經尚可作人師

將至上海泊嘉定柵橋欲渡吳淞江阻風却就肩

輿行三十餘里途中即目

迴風阻孤櫂波浪正奔渾烏榜停煙渚籃輿過水村禾  
生稀似髮樹倒半留根歲事那堪問蓬蒿翳華門

陸行逢盛暑猶喜逐涼颺過客休林樾村農說市朝潮

生沙上樹雨甚水平橋甚雨見左傳雉堞參差見征途未覺

遙

秣陵太守行

太守陳鵬年湖廣  
湘潭人辛未進士

秣陵太守今召杜材產荆南行鄒魯心似寒泉徹底清  
只把窮黎手摩拊官廚索冥贖壘鹽妓館蕭條斥歌舞  
政聲早溢石頭城比屋年來增襦袴褰帷共喜識神君  
但嫌太守來何暮大吏橫飛白簡霜倉皇便解腰間章

不知所坐竟何事大家小戶皆驚惶商賈爲罷市農夫  
爲輟耕士人廢書歎何用求科名嗟嗟太守仁且清蠶  
書宜褒異增秩比公卿不爾亦堪拜水衡一朝無事來  
彈劾浮雲黯淡日無色直須躑躅抵廉貞翻指由夷作  
貪墨麒麟疑不祥鸞鳳遭置弋嗚呼太守方繫拘可憐  
褚橐無錙銖爭言太守真父母奪我父母民羈孤民生  
長養由父母父母無食民當舖或餽一斗粟或投一束  
芻或獻肉一豆或餉酒一壺太守無錢日醉飽安用篋  
箱錯落堆金珠足知斯民三代直天鑒可蔽民難誣吁  
嗟乎治道從來關守令激揚全賴官評正只今流品溷  
淄澗到處相逢說苛政太守去官名益高三褫榮逾錫

九命獨悲廉吏急驅除何不留取斯人活百姓

六月二十一日紀異和周礫圃

去冬無雪聞殷雷陽氣不收占水災三春爛熳晴偏久  
乾風捲地吹黃埃焦暵田家望雨切誰知雨至無斷絕  
五月川溝平六月隄岸決涔涔漏天不肯晴豐隆晝夜  
聲砰訇禾苗漂沒木棉爛金鴉斂翅韜光明忽然破柱  
驚霹靂紫電劃空半天赤須臾飛電挾狂飈亂射軒牕  
撼牆壁或疑長平金鼓碎屋瓦或疑女媧墜下補天石  
渠塘頃刻翻波濤魚鼈驚淪鼃鼉驕厚地平抽十圍樹  
村居盡捲三重茅簷溜鋌錚厭淫雨小民何罪干天怒  
即今無計辦官租敢望私家餘二鬴傳聞淮北更堪傷

金隄千丈裂河防雜沓流尸蔽河下勢踰淮堰決蕭梁  
可憐黔首紛如蠹草索相連一時死人隨雞犬盡漂沈  
月黑羈魂哭煙水吾鄉僅止荒菑畬民生猶免飽鯨魚  
飢窮聚首有妻子風雨藏身尚室廬嗚呼皇天方降酷  
一荒苟活寧非福水沒堂坳枕篔簹半菽簞供吾亦足  
送郁庭望學博之任通州兼柬周西園孝廉

文章曾是動中丞庭訓家規自昔承  
賞酒權分博士俸  
讀書仍映講堂燈  
三更海月升高閣  
八月秋濤到廣陵  
最喜白雲親舍近  
板輿興至得時乘

汝南世戚舊家聲  
少俊登堂倚老成  
楊惲有書傳外祖

謂東岡先生  
王融同載得賢甥  
王融愛其甥劉孝綽每同載訪友謂西園  
看潮連

騎時相挈伏臘分羊幸免爭較算廣文今最好居官仍  
似在家清

壽王冰菴太守五十韻

符采停鸞秀高閒立鶴姿悟從夙慧得書自弱齡披鋒  
淬新斲刃才標脫穎錐大科華閥繼絕學曲臺推把卷  
襟情適澄懷世事遺固宜登翰苑豈合廁曹司講席儒  
羶冷籬門窟室卑僕僮嫌寂寞導從缺威儀月俸分紅  
粟晨餐薦綠葵室甘懸磬乏身等繫匏羈伏臘頽羊瘦  
朝參借馬騎地輕無指摘歲滿有遷移郎署淹三載雄  
區試一麾名城傳少伯仙宅接微之傑閣臨秦望靈編  
訪宛委稽山高截業鏡水蕩漣漪澹泊安吾素脂膏敢

自私寬廉劉寵志清淨蓋公師俗厭商君法人依杜母  
慈文章化喬野煦嫗恤罷羸孤立惟行意周旋實有虧  
官評淆黑白流品溷澀溜由竇時多徑他途義不爲金  
憑衆口鑠毛任索瘢吹正坐逢迎嬾何關治行疵時余  
司考課爲爾獨嗟咨大吏飛文枉銓衡畫諾隨近例大  
計疏上  
惟薦舉得行駁正  
餘署成案而已九閹淡誅蕩八法長奸欺躑躅爭延  
譽由夷被詆謫人心雖共惜公道竟安施當戶鉏蘭蕙  
充途養棘蕘但知推武健何計起瘡痍垂索看瀟灑攀  
車感涕洟去無三宿戀送有百錢齋居職貧如故歸田  
理亦宜祇餘松徑在不辦草堂貲老屋藤蘿補疎簾荻  
葦垂誰過揚子宅常閉董生帷借米供朝爨鈔書映晚



曦學從靜裏細向淡中竒憶昔牽塵鞅相憐竝旅羈  
西園常共讌東閣得同窺芍藥豐臺路芙蓉渌水陂從  
容依廣厦偃息廢華榱誰料孫弘客俄銜謝傅悲班資  
分內外蹤跡遂差池久有同歸興誰思好爵縻當君旋  
里日是我左官時勝引多攜手微言各解頤兩窮堪結  
侶五字可論詩末學聊闖管洪波漫測蠡拙曾嗤仕宦  
巧獨占文辭殿省當時貴名山後代知欲翻鯨海浪一  
雪雁門蹄漢書段會宗傳足以復雁門之蹄蹄謂蹄雲  
構般輪斧騷壇大將旗才終分斗石聲敢應堦篋却掃  
門如水懸弧鬣未絲德從先世種穀自後人詒潘岳雖  
無婦商瞿必有兒已栽三島樹仙果莫嫌遲

壽倪草亭七十

青衫席帽久纏身鎖院名場憶苦辛  
冰雪文章難入俗煙霞詩句不猶人  
蘧廬天地終須老書卷生涯自古貧  
後輩莫欺秋髡短酒酣經史尚紛綸

錢瞿亭舍人輓詩

君家秦川貴累葉乘朱轡自幼失嚴父弱冠持家門承  
師奉函席侍母升輕軒約束戒僮隸儉豆洽弟昆辟雍  
擅英譽相期早飛騫竟踈千里足未能絕塵奔投牒得  
一官棲遲戀晨昏起居視色笑冬夏潔清溫傳家習華  
撫服食擬王孫盈樽傾北海飛蓋集西園歌聲按銀雁  
舞袖翩遊鷗林容花似繡峰勢石能言客至每忘返十

日滯平原晚年迫多故力瘁向平婚外觀尚崇廓名高  
實不存向予頻歎息恨無忘憂萱嗟我與君交相應箎  
與壘俯仰數十載初不間寒暄我觀友朋中古處惟君  
敦損己不求益卑躬自忘尊新詩擊鉢就邀我與細論  
曾未及中歲竟遊岱宗魂賴君多令子國器竝瓊璠連  
翩曳華黻俱承 聖主恩獨悲君早逝淒涼哭陳根

東江詩鈔卷第八

東江詩鈔卷第九

太倉唐孫華實君橐

受業陸

師巢雲編

九月十八日高詠堂小集分韻得平字

秋氣忽淒厲感此長年情階前兩病樹孤根無久榮商  
風一蕭颯衆葉策策鳴草木亦乘時逢辰吐華英揚芳  
苦不早安得長蔥菁我本衡門士晚晚竊一名羈宦那  
可久拂衣且歸耕荏苒老便至仕學兩無成夷險身備  
歷得喪心俱平今茲歲失稔敢厭芋魁羹量力宜知止  
適志在無營幸因年齒暮得使衆嗜輕勿嗟百卉腓庶  
保松柏貞淹時患溼潦仍肯當秋晴霜高萬物肅天清

四野明悄悄夜蛩寂噉噉晨鴻征嘉賓偶然集經史談  
縱橫雖無東籬菊有酒聊共傾

春日病中雜詠

連旬瘦骨苦支離病與春光總不宜蠹篋蛛絲搜藥裹  
酒鎗蠟屐負花期親朋零落黃壚隔身世蕭條白髮危  
茗粥三餐兼菜俎更將何物補清羸

一春無復駕巾車冒絮蒙頭困不舒身為晏眠豐暇豫  
腹因斷肉得清虛家人問卜祈延算好友相規罷讀書  
可惜韶光愁裏過落花飛絮滿庭除

日長寂寞臥漳濱牢合雙扉恰二旬道左幸全緣苦李  
廚邊供爨已勞薪靈氛何用謀著策祝史無煩瀆鬼神

但使扶筇還強起一樽猶得餞殘春

和風暖氣日氤氳鳥語鶯啼寂不聞展卷病眸昏似霧  
擁衾殘夢亂如雲經方未信肱三折清瘦潛消臂半分  
自愧靜中無定力撞胸心事尚紛紜

扶攜骨立勉支撐顏面人驚太瘦生久閉帷房真似婦  
難調飢飽復如嬰稍欣葦戶疎綦履厭聽風爐沸藥鐺  
却羨田間多野老往來阡陌杖藜輕

人生憂樂每迴旋椿菌區分亦偶然幸有餘糧支儉歲  
可無薄病壓災年雀羅蛛網幽閒地蝶舞蜂喧長養天  
翻喜衡門清似水黃紬淡擁得高眠

有客

有客就我謀爲言將遠行出門向西笑欲造長安城故  
鄉旣偏反安能守柴荆子旣即我謀語子敢不誠浩浩  
帝城中車馬日砰訇敝衣策蹇衛懷刺謁公卿闔隸竊  
窺伺斜睨分重輕十謁九不通誰當纒履迎喧闐聲利  
場八方聚才英行卷壓車軸候門邀題評貴人意不屬  
一覽目但瞪高談厭狂率拙訥鄙荒傖旅食大不易孤  
蹤况嫫嫫諸儒排主父僮僕罵侯嬴自非陳孟公難令  
舉坐驚窮途一失足何異墜崖坑季鷹賦首丘張翰有首丘賦  
非不念功名出處理則同時來自有成勿如南郡生區  
區慕上京

喜宮怨堂擢第簡庶常



駒齒先馳三載餘

令子先成進士

裁看老驥籥雲初才名久占

今詞伯侍從新添行祕書王述每誇兒不若伏滔定詫

父何如

晉書伏滔呼其子系之曰百人高會天子先問伏滔在否爲人作父如此定何如也

蘭臺

石室須論討莫逐鄒枚賦子虛

### 喜呂無黨及第

卿雲瑞靄日華邊臚唱聲聞玉陛宣文譽豈關登上第

制科自要得名賢五經字待中郎正七略書從子政傳

謂晚邨先生

寶氣昔年曾聞識好音入耳亦欣然

無黨鄉試表策語多

古與同考不識予特拔之

### 礫圃過談雙鳳事有感

鳳里吾生長經遊過墓門繚垣千石拱喬木百年存幸

免逃兵火難防是子孫柏庭無處所故鬼哭陳根

東方朔云

柏者鬼之庭也

宰樹何年植陰森檜栝溪牛羊俄上隴鸛雀早辭林俯

仰悲時代興衰自古今賈逵碑石在所恨不生金

晉書懷帝

時有魏賈逵石碑生金可採

### 記里中事

膠庠洶洶日揚波歎息無端觸網羅但為人窮輕性命  
豈知吏法重催科書生群聚遊談出世上危機筆舌多  
側足焦原輕試險千尋無綆待如何

時事何容口舌爭畏途休作不平鳴藏身複壁疑無地  
密語登樓怕有聲書牘人方尊獄吏溺冠世久厭儒生

閉門塞竇真良計燕處超然萬慮輕

水車行

一月不雨蒸炎燬上田下田禾欲焦東方未明盡室出  
婦子相呼牽桔槔蓬頭露體鬪輕健三尺青布裁圍腰  
終朝軋軋直至暮首如鶴啄尻益高麥飯一盂取充腹  
脣乾不得沾村醪踏車晝夜空辛苦坂田境處猶乾土  
樹頭隱隱聞雷鳴車上農夫喜欲舞遙指陰雲西北來  
今夕高眠聽澍雨

鋤田行

瀕海高田半鹵濕木棉初長不滿尺非種相侵易蔓延  
手把鋤頭那許釋久晴無雨土益乾鋤頭下處如擊石

偏到炎天戶戶忙日午當空火織赤可憐一笠不遮身  
樓背長供紅日炙鋤頭側入不容差誤鋤惟恐傷根芽  
草盡更祈微雨潤眼穿幾日開黃花海風但願無漂蕩  
秋到家家動紡車

疊前韻酬礫圃

羨道俱圍石溪流自繞門荒丘竟烟莽華屋憶生存松  
落全無子桐枯豈有孫應同濯龍樹流血灑蟠根

魏武  
伐濯

龍祠樹樹  
皆流血

古木風霜老滄江歲月淡赭鞭方縱斧

見王  
莽傳

赤地似焚

林封植猶思昔銷沉豈料今恨無隗炤版壁下早藏金

見晉書  
隗炤傳

戲詠古事

德祖聰明速禍胎文先夫婦寸腸摧有心僅送青衣女

才子捐軀換得來

曹操殺楊修送楊夫  
人有心青衣二人

閤門驅出後房空一事無情事事同此手自應能作賊  
人間浪說是英雄

躍馬無功老著書敬通才志竟窮居縱饒茅土封侯貴

詎可禁當語百車

見馮衍與  
任武達書

沈宋才華自絕倫樓頭水鏡品題真一人知己昭容足  
何用明河更問津

題隨菴先生畫

樹色異高低山嵐互迴複神超謝雕飾筆老轉清淑著

墨何用多悠然氣象足境疑華子岡法授車箱谷桃笙  
淨無塵游戲了三伏想當濡毫時涼風生謾謾此中可  
避世白雲冷心目似有幽人居穿林結茅屋

照孫年五歲日戲堂前偶作

刷翠雙眉玉雪姿堂前跳舞任游嬉平欺兄姊矜儂巧  
遍喚群童聽指麾買得泥車旋便棄拾來竹馬不輕騎  
生憎謝瑒無才思可得生兒似客兒

竹馬用桓  
温殷浩事

雛鳳嬌癡心尚孩綵衣窄袖稱身裁慣窺賓客逡巡出  
學作官人呵殿來愛搦蘆笙吹短弄日搗腰鼓沸春雷  
阿翁老大無他望只望聰明少蓋才

題吳長卿先生宋相譜冊子

韓王置酒爲銷兵，兵去誰知節帥輕。  
盡撤藩籬延敵騎，忍看銜璧到青城。

妝點錢唐作汴州，君臣燕喜竟忘讐。  
咸陽巧爲金源計，秦檜當國人不取。  
斥言皆呼爲咸陽良將先教死杜郵。

信國遭逢起一經，麻鞋奔走歎零丁。  
西臺憑弔唐開府，碧血千秋照汗青。

賈誼文辭本借秦，三朝金虎沸宮鄰。  
書成早下銅仙淚，故老傷心話甲申。

斗極銷沉上相星，瓚宮故鬼泣冬青。  
蘭臺石室俱煙莽，寥落中條修史亭。  
司空圖有修史亭詩

中秋日集汪見三池亭

積雨裁逢此日晴，秋光似解主人情。  
園疎落木通山影，池洗殘荷放月明。  
白石迴廊穿窈窕，碧欄砥室俯澄泓。  
毛萇神彩渾如舊，一笑樽前病體輕。

謂端峰

弇洲才筆邈難攀，綺麗餘波水一灣。  
老檜尚存劉尹樹，片峰猶指謝公山。  
文章氣運銷沉後，泉石風流想像間。  
小割池塘供燕賞，偏容我輩縱疎頑。

見三池亭故弇園一隅也

### 壽朱雪鴻七十

急裝短袖不宜身，風貌居然古逸民。  
有暇偶尋鄰社約，無求自穩在家貧。  
坐中獨掣談經席，雨後爭看墊角巾。  
知是天心留碩果，行窩到處即陽春。

### 冬日書懷

汪梅麟約題



嚴霜凋百物歲月忽已邁白日下崦嵫盛年不可留避  
寒且瑾戶一編自勤讐往來聞剝啄實苦應接稠思欲  
逃蓬藿棲彼林谷幽淳風久凌替氓俗日已偷漚麻有  
鬪閱爭桑或尋讎此何預我事慎無即我謀庶能衰老  
子餘年得優游

自古推上腴原不數吳會些窳僅偷生家室鮮藏蓋閭  
左多情游流風習侈汰近復揚其波土木盛雕繪積壤  
糊山川錦繡紛綵繚餘皇張旌旗冶女炫珠貝荒稷時  
一遭俯仰將安賴雖蠲累歲租曾未起凋瘵譬若人中  
乾膚澤乃其外願思古人言爲樂無已太  
窮冬天地閉霜野色凋枯雖獲一歲稔不償累年逋飢

寒思攘奪往往聚萑苻殺人吏不問誰復憚刑誅綿延  
不早絕滋蔓恐難圖農民舍耒耜化爲豺與貙夜聚曉  
輒散聯結實有徒此憂或非小藪澤鄰江湖吾無民社  
責袖手但長吁

少小好文字聰明若可鞭鬪捷童子場濡毫自成篇駸  
駸就道路欲度驂騑前壯志竟不遂浸尋忽華顛古儒  
重經學鄭孔分註箋展卷若有悟輟簡復茫然老至成  
鈍廢行當謝丹鉛汪倫能好我置酒會群賢安問身後  
名一樽錢殘年

張萑園齋觀離資園圖

園係王元美先生別墅

居然巖壑近城闈想見當年卜築新山徑有花皆蕙芷

市朝何地不荆榛  
賓朋共賦梁園雪  
水竹全消庾亮塵  
兄弟才名逢盛世  
行吟終是異靈均

弇山遺跡半銷磨  
此地儵然尚礪阿  
四部文章冊府在  
一丘風月小園多  
石荒苔蘚峰猶古  
沼冷芙蓉水自波  
二百年來陵谷改  
畫圖莫訝稍差訛

三徑何妨略改移  
橋通步履入疎籬  
王維亭館今餘幾  
張緒風流又一時  
花好爲添新綺樹  
月來仍映舊清池  
羨君燕處離塵網  
芳草無因怨蒨葦

舍南舍北總嚶喧  
長掩雙扉寂似村  
惡草只今仍塞路  
芳蘭自古忌當門  
藥欄花嶼供賓客  
蕙畝芝田長子孫  
半樹斜陽如勸飲  
遲歸且復盡餘樽

壽郭雉先七十

城南蕭灑得吾廬清德如村處士餘

如村斯士先生齋名也

地下

早揮金椀淚井中重洗鐵函書敢邀榮祿違先志薄有

田園足隱居細字巾箱殘卷在傳家經訓是菑畬

謀生麓就一菟裘寢食寬閒得自由小圃兩滋蔬甲長

平田水滿稻花秋不須帶劍隨翁伯

郭解字翁伯

絕勝乘軒

擁細侯

郭伋字細侯

塵土功名那挂眼角巾先世舊風流

草聖祠

在常熟直水張氏所建

丹雘初看祠廟成墨池能事最縱橫九天鸞鶴濡頭下

百變蛟龍運腕生卑宦曾為常熟尉高名獨擅太湖精

李頎贈張顛詩皓首窮草隸時稱太湖精

遙遙華胄人誰辨應似林宗問阿

貞見北齊書

寒食日泊舟惠山對雨

暫卸征帆泊水濱  
輕埃微雨正紛紛  
風來忽颭沿溪柳  
煙起疑添別岫雲  
坐繫衰翁愁白髮  
驚迴遊女濕紅裙  
連舟同伴知何往  
惆悵孤鴻每失群

生公臺畔厭繁華  
且泊梁谿占淺沙  
雲起時從青嶂出  
嵐光不受絳樓遮  
絲瓶競挈人沽酒  
石磴分斟客試茶  
獨惜來遲春較晚  
冥冥細雨落桃花

終朝溜雨響潺潺  
石徑沾泥竟未攀  
溪宿無妨高臥穩  
舟居差較在家閒  
長年飽飯惟擔水  
永日繙書正面山  
翻覺吾廬輸好景  
紅欄橋畔綠楊灣

薄暮偕王素巖太史遊惠山坐石論詩

懶躡層臺迴斜穿曲徑行同來山澗夜祇失月華明亂石高無路流泉細有聲論文如不厭小坐淺坡平

顧端文公祠

斗杓當代擅聲華俎豆江干歲月遐文舉才高多忤物太丘道廣亦藏瑕流傳壇墀朋徒滿棄置邊疆黨議譁國論是非終未定憑將青史辯忠邪

黨人南北始甘陵未必名賢合一朋正氣共知歸洛蜀品流獨惜混淆澗異時虎口遭王甫當日龍門重李膺猶幸早騎箕尾去不同忠憲赤車徵

高忠憲公與公同里死於魏璫之難

舟雨遣悶

風吹船背雨廉纖  
敲坐橫眠也不厭  
且喜篷牕當翠巘  
恰如水閣挂青簾  
槃供春筍蔬羹美  
爐煮清泉茗味甜  
山色陰晴看盡好  
纒維判作一句淹

滄江久臥隔朝班  
老避喧闐滯水灣  
擊汰怕衝風逆浪  
鈎簾閒看雨皴山  
逢時少俊承新寵  
得路親交換舊顏  
却笑儒生思獻賦  
欲持片紙撼天關

有感明季黨事二十二韻

明季當神廟人情逐黨同  
清流殊挺拔僚寀失和衷  
三案喧脣敝千章聒耳聾  
邊防談笑外國議是非中  
誰使緘防口姑令瑱塞聰  
羣言皆寢閣萬事益荒叢  
氣槩門牆峻交遊寰海通  
聲名驥尾附假竊虎皮蒙  
璜愴權方

授膺滂道轉窮鄭朋翻媚顯郝慮早讒融羽翼東林廣  
鷗張北寺雄驍騰多宋鵲指嗾聽梅蟲斥堠頻傳警宮  
鄰祇內訌關城各解甲朝署尚彎弓勢急猱升木防疎  
雉罹置源流復社接壁壘浙人攻變態紛離合相傾竟  
始終蝸蟾音響歇蠻觸戰場空各自愁翻手其誰念匪  
躬廟堂曾誤國溝瀆枉埋忠矯激誠何濟煩言豈論功  
汗青何日就珥筆待虛公

陪座主通政任公飲同年惠沛蒼刑部寓齋

函文追陪笑語親琯盤綺食咄嗟陳同年憐我成逋客  
異地煩君作主人繫舫恰依鄰巷近行廚仍抵在家珍  
黃墟酒伴多零落珍重蘆廬寄寓身

時聞同年吳西齋之計



毘陵舟中聞同年吳西齋給諫訃

年少科名昨夢虛錦溪才筆玉溪如

錦溪君所居地名

一官翻

使田廬廢三爵多防口語踈輕豔早誇驚蛺蝶老蒼猶

待掣鯨魚篋中遺藁勤收拾恐有求書使者車

君奉命修書

春風忽已敗叢蘭回挽曾無九籥丹老母尚銜三月淚

先公未卜一丘安淵阿鋒穎多招謗風絮心情不耐官

同榜少年偏早去水牕惟有涕汎瀾

戊辰吾州同年五人君齒最少今逝

者三人矣

泊舟葑溪風雨淒然書悶

鶯花三月正暄妍忽值斜風細雨天輕幘乍施仍冒絮

袂衣初試又添綿芳春作客同秋士暮景思家倍少年

安得閉門長不出黃綉淡擁日高眠

追輓張烈婦

淮安人太倉黃名山妻

黃童故無雙皎然玉樹姿少小承家學深翰發英詞清  
河有淑女習禮復明詩簾幃晝不捲門牖未曾窺女居  
淮淝濱郎居婁水湄二父敦夙好千里締姻期黃郎家  
素貧迎娶苦無資辭親作秦贅燕婉正相宜願爲共命  
鳥永託連理枝成婚未匝歲思親遽南馳閨人意纏綆  
臨發手重持君行念高堂何能強繫維黃郎相慰藉我  
行非久羈暫別歡會長幸勿歎睽離豈料還故鄉一病  
漸疴羸遍請巫咸招博延秦緩醫淮西音信隔邈若在  
天涯思婦日凝盼寂寞守空帷徒費金錢卜言語多參

差裏糧走一介郎病已瀕危使回得翁書知疾不可爲  
此時少婦心驚痛裂肝脾生緣諒已淺泉壤庶長隨未  
及拜姑嫜尚闕廟見儀已婚猶在室長負父母慈心傷  
貌不改恐致家人疑倉皇投尺組畢命黃昏時夫死後  
一旬彼此不相知荀采書還陰引決翻嫌遲遠近傳節  
烈萬口同嗟咨古有華山畿但殉兒女私豈知死所天  
大義無瑕疵彤管紀貞芳天壤同昭垂

端陽後二日邀諸友草堂小集

連朝簫鼓息河濱好客相攜且論文日映花枝紅似火  
雨來樹影綠生雲眼中耆舊思常見世上誼叟願不聞  
鄉里只今誰扞護聊憑詩酒張吾軍

治圃次礫圃韻

編茅餘隙地塵外遠郊如老樹侵雲直新篁帶月疎  
籬分畛域煙火即村墟便欲栽瓜芋聊尋汜勝書  
閒門稀客到鳳字不須題曉露桐花落春風菜甲齊  
爭枝看啁雀樹柵隔鄰雞共指詩翁宅幽淡即灑西

張母陳太孺人貞節詩

閩解元張遠之母

閩海陳貞婦節義共姜徒綺歲失所天拊膺願捐軀仰  
瞻高堂上猶有暮年姑俯視懷抱中更有期歲孤隱忍  
且偷活血淚為之枯家世本清貧朝夕自支吾何以膳  
我親典我嫁時襦何以補我屋賣我釵頭珠孤兒復善  
病晝夜泣呱呱似續懸一綫相依性命俱籲天請身代

跌蕩若可呼風巢兼雨戶長此鳳凰雛佔畢課經訓視  
聽戒陝輸的爍階庭下琪花秀一株事親力既瘁撫幼  
心彌劬娥月悲掩曜中歲忽云徂有子羽翼成負米日  
馳驅痛念聖善母平生少歡愉禽鳥有反哺愧彼屋上  
烏勉思貽令名積學成鉅儒首折却詵桂行棄終生繻  
節孝理必昌天道果非誣 旌命下九閭 恩綸賁黃  
壚烏頭表雙闕照耀天南隅風烈昭彤管永爲後世模

夏旱述憂四首

炎歊匝地正如焚萬井焦原早罷耘電笑巖邊疑作雨  
風來樹杪只銷雲乾埃滾滾黏青草落日曛曛散赤氛  
跌蕩天門原自闢民勞可許綠章聞

通渠小艇絕經過坐視平疇槁穉禾太華直愁乾玉井  
層霄空望瀉銀河西郊雲斷三時雨東海潮慳一掬波  
安得天瓢攜在手便教揮灑遍滂沱

攫金胠篋久縱橫天意還疑助沸羹尼運有期誰得免  
訛言無故只相驚一錢世逐錐刀重三尺人看性命輕  
老去豈堪逢患難腐儒祇是祝昇平

盜泉分酌苦殃民喜見神君丰采新月暗頻驚飛白弩  
時來便擬著黃巾輕刑但可沾新國除惡方能護善人  
偉節好生公用殺千秋二賈並稱仁

尸三盜魁於市民大悅  
賈公名樸北直故城人

東漢賈彪禁民棄  
子女今觀察賈公

題張漢昭小像

拘士營一隅達人隘九州紅塵蔽天壤奔走何時休朝  
市人所趨道路狹且稠爭門或詐指擊轂多傾輶何如  
處山林消搖百無憂張子澹蕩人家世豈留侯本是神  
仙姿飛夢入瀛洲今觀圖畫裏髣髴見風流崇嶺鬱嵯  
峨長松矯蒼虬雲氣如奔濤蒸涌巖端浮繽紛五色芝  
一僮筐可收中有餐霞人緩步正夸猶同遊偕二子倚  
石恣淹留寥寥蔣生徑賴有羊與求聞君妙方術六疾  
應手瘳昔者陶隱居華陽結層樓桐雷有遺編損益自  
勘讐濟物功旣弘終登列僊儔君思躡員嶠把袖追浮  
丘煙墨何蒼茫想像洞壑幽誰能爲此圖或是顧虎頭  
不知天地間果有此境不十賚倘可邀吾願從君遊

雨牕小集次同年陸匪莪侍御韻

肯紆飛蓋到貧家牕紙新添當綺紗吾輩今宵仍綠酒

幾人修夜掩青霞江淹恨賦鬱青霞之奇意入修夜

螯澤竭無佳品籬菊叢荒失物華獨有庭前餘野草雨

中歷亂臥殘葩

秋日集顧自申鹿樵溪舍觀芙蓉

野史亭開傍水涯直將秋豔鬪春華餐英未放籬邊蕊

蘸影先看木末花黃葉半林通晚照丹輝隔岸映朝霞

潘岳芙蓉賦丹輝拂紅涉江多少騫芳侶一種嘉名許並誇古詩芙蓉

即今芙蓉

謝公讌賞舊山莊載筆當年著辨亡梅村先生有鹿樵紀聞一書勝



地半看淪宿莽曲池猶自簇鮮妝花憐頰頰如人醉芙蓉  
佳者俗名三醉客對秋林感髣霜遺老風流餘綺麗酒闌指點  
話斜陽

壽座主講學仇先生二十六韻

當代隆文治醇儒應運興  
飲爰占客夢枕膝得師承  
緝柳編春課燃松續夜燈  
微言繼鄒魯異學辨淄澠  
弟子橋衡肅先生講席升  
冥蒙開宿霧凝結泮堅冰  
說易排王弼談經折戴憑  
鴻都空自銜綿蕪漫相矜  
射策金門入修書玉署登  
宦情殊冷淡同輩早騫騰  
暫乞湖山假棲遲歲月仍  
請求無筆牘著述有籤滕  
餘興論詞苑長箋及少陵  
方耽鷗沼穩忽被鶴書徵  
仰望人情切便蕃

主眷膺碧山推學士黃髮備凝丞恬退官仍進超踰  
秩屢增承華資翊贊博望得賓朋光近前星耀榮瞻卿  
月昇傳家鸞掖重接武鳳毛稱矍鑠神長健冲虛量益  
弘顏丹老愈渥腰綬瘦還勝憶昔趨函丈頻看灑剡藤  
洪鐘雖許扣窺管竟無能敢躍龍門鯉忻隨驥尾蠅師  
恩慚報効祇是祝升恒

題王隨菴畫

天外煙巒點翠鬟秋林掩映屋三間此中安得移家住  
岫幌閒看遠近山

楓冷吳江落木天筆牀茶竈水牕前垂虹橋畔輕帆過

便是元章書畫

畫寫於吳  
江舟中

米貴

今年春夏交翠毯鋪滿畦一旱連三月通流斷川谿窪  
土盡坼裂良田罷耕犁涉秋霑霖病葉稍萋萋謂足  
了官租佇望頻凝睇豈知秋露下禾頭不肯低玉粒竟  
何有僅長稗與稊空田噪飢雀落日氣慘悽常平預積  
粟本用恤災黎穀飛化爲蠱曾不留糠粃官吏恣侵食  
穿穴久成蹊稻隴空雲水米價日升躋鍾釜裁入市爭  
糴互推擠抑價與遏糴此策古無稽秦粟曾輸晉魯飢  
仍乞齊有無不相通咫尺越燕睽窮民急升斗苦雨轉  
淒淒幼稚盈茅舍索飯門東啼霑體拾殘穗漉此數斗  
泥一飽有餘愧安敢厭鹽齏

次韻酬陸匪莪侍御

何妨作達任疎狂，蟻穴蜂衙爲宦忙。  
宦學半生殘夢短，山林一日小年長。  
讀書未厭撐腸飽，得祿聊須染指嘗。  
庭戶知君清似水，有人共擬鄭公鄉。

擬向江干理釣綸，東華悔踏軟紅塵。  
牽絲偶作影纓客，散髮仍爲擊壤民。  
日下簪珂多後輩，少年裘馬笑陳人。  
幸逢慧曉連坊巷，池上同看柳色春。

常熟張節母

婦于氏子張一桂有學行

節孝兩大開千古，不能踰天經與地維。  
賴此得撐扶於今，推禮宗琴川張母于盛年喪所天。  
寸腸裂如剗泉壤，願追隨奈此舅與姑子生方三月懷中泣。  
呱呱翁媪相

慰藉好爲撫遺孤勉強延視息偷彈血淚枯賣珠待補  
屋易粟資辟纊上養高堂親下育襁褓雛令子幸成立  
卓犖爲名儒尊璋復下世毀絕得重蘇竭力就含殮辛  
苦自拈茶行營卜新阡高原正膺膺纍纍成七丘次第  
安黃壚一身支百艱孰謂非丈夫有兒能色養甘旨奉  
時須晨昏不離側願爲反哺烏湯公旌節義風教行三  
吳烏頭表雙闕焯爍照寰區寶婺雖掩輝芳聲不俱徂  
東南山水秀綽約多名姝容華但自矜貞行罕不渝卓  
女朱家婦吳蜀互擲揄見蜀志張裔傳惟此節孝門閭里共嗟  
吁遺書教韋逞殘扇泣張敷子游文學鄉流徽漸海隅  
我詩不苟作用爲士女模

寄題和州王氏五烈祠

王用賓妻尹氏王用賢妻杜氏王用聘妻魯氏王極

妻戴氏從女年並死於明崇禎乙亥獻賊之難

蘭鋤不改芳玉碎不渝潔君看歷陽王氏門彤管千秋  
傳五烈明季中原沸寇氛蔓延南北誰遮截石印山頭  
烽火驚孤城望援虬蜉絕殺人更肯留妻孥軟弱難將  
一死決豈知王家四婦兼一女引頸從容同殉節寧死  
乾淨土不死賊巢穴寧齒王家刀不膏賊刃鐵紛籍填  
渠總一門泉路相逢似與姪露尸三日色如生神護不  
許飛蠅蟻委地猶然姑射姿骨作梅檀體冰雪反顏易  
面多冠裳大義誰知出巾櫛只今祠宇鬱嗟峨共擷蘋  
蘩修薄醊祠畔靈旗風肅然杜鵑月夜聞啼血

憂時

茅屋家家各罄懸  
蒿萊極目遍良田  
充腸無復桃花米  
騰價空持荇葉錢  
爭糴人多喧小市  
生塵釜冷斷炊煙  
微聞秔稻從東去  
轉海雲帆別有船

流言入耳總心驚  
擾擾終難慰物情  
何處深山無虎跡  
即看大澤有狐鳴  
催科裁下蝸蟾沸  
恩命初頒雀鼠爭  
只合杜門常避事  
餘年惟望泰階平

然  
年家子楊位凝家貧出遊不遂大困而歸為之愴

嗟子貧何甚蕭然破屋棲  
尚聞投杼母豈有下機妻  
雨雪衣裘薄風塵面目黧  
窮途更何適悔到雲川西

身言金卷九  
俗薄宜安坐家貧難掩扉裹糧三月計垂橐一舟歸  
葛帔孤裝冷綈袍客路稀艱難同此世莫道故人非

恭紀 特恩蠲租次匪莪韻

不用司農費酌量 恩綸忽自九天翔便忘湯代恒暘

烈惟覺堯天化日長莫曆未更先給復蠲明年租葭灰漸動

早回陽時在冬至前遍看黃紙懸街市萬口喧喧喜欲狂

側席憂民賴 聖謨殊恩汪濊古今無禹邦猶自分三

壤漢代應慚減半租印匣有塵閒案牘石壕無吏息追

呼靈長 皇祚知無極底事陰謀尚有徒

紀異

海島憑依似有因細聽風鶴總非真絳巾袂首仍田父



繡鬢衷衣似婦人

賊多掠婦人衣服之

野鼠群多俄自舞妖狐歲

久亦能神幸逢海宇昇平日吾里何緣震虢頻

文武封疆有重臣運籌須早息烽塵牙旗玉帳軍容盛  
紅粟朱提轉餉頻未見隄防能豫備惟修宮館待時  
巡草茅何預安危事賈誼憂淡在積薪

### 雪中會錢再亭京兆葬

席帽追陪憶往年榮華一夢散如煙誅辭好倩中郎筆  
薄俗誰誇京兆阡

京兆阡見漢書原涉傳時里人多有阻葬者

寶劍終虛季

子諾輜車似待巨卿前臨風添得衣冠縞酌酒偏逢雨

### 雪天

彤雲慘澹助淒涼感舊懷人意倍傷抗疏威稜推二鮑

謂葭渚  
侍郎 尹京風烈繼三王黃雞唱曉催歸速白馬流蘇  
會送忙偏是故鄉車過處雙鳳為子故里九原宿草正茫茫

東江詩鈔卷第九

東江詩鈔卷第十

太倉唐孫華實君橐

受業陸

師巢雲編

苦寒次和陸匪莪侍御

不堪垂老遇屯遭  
萑戶蕭條歲暮天  
豈有大裘遮比屋  
直將小劫抵災年  
心如灰燼難生燄  
愁比膏明只自煎  
試向南榮嚙朝日  
可能餘煖入丹田

戊子元旦

改歲仍餘料峭寒  
雙扉合閉一泥丸  
傷時但有三絨穩  
避客多因再拜難  
過眼光陰如夢寐  
關心間井望平安  
但看椒酒盈樽渌  
俯仰悠然丈室寬

宿雨初收旭景曠紅箋帖子燦千門荒餘共冀天心轉

詔下群霑 聖主恩騎竹諸孫歡日暇杖藜一老望春

温風雲早卜今秋稔禾麥行看綠滿村史記天官書元旦宜終日有風

有雲  
有日

### 元旦次和隨菴韻

滄江無恙一詩翁杜老何妨左耳聾樽酒今朝仍綠蟻

燈花昨夜綴金蟲海天長駐蓬萊日里井虛傳草木風

自是高賢安澹泊無煩咄咄更書空

### 贈商州丞名奕銓會稽人州同知

紛紛胠篋與揆丸白晝公然敢揭竿收縛潛教篝火燠

干掇常犯曉霜寒民生事大須憑膽保障材高不論官

獨賴老謀能鎮靜閭閻稍喜得龐安

偏從佐治守官箴解舍蕭閒事不侵殊績敢邀憲府薦  
獨清聊盡小臣心終年未飽侏儒粟昏夜頻麾伯起金  
自信生平無諛語和歌也愛邑中黔

隨菴先生贈周礫圃藤杖礫圃喜動顏色杖以過  
余索詩爲贈

石礫蟠千尺蒼藤瘦一莖賜逾靈壽重攜比樂全輕

以鐵拄杖贈樂全先生遇友斯須駐尋花自在行華陽筇竹賚珍

重故人情見陶弘景十賚文

憐爾跣躡久終朝走道途但令雙屐穩不歎獨行孤得  
自高人贈如添健僕扶百錢容易挂隨意問黃壚

視張彤友病時已不能食

故舊淪亡感逝川，豈知君病又沉綿。  
素交何處尋遺老，末契終難託少年。  
平日愁無十斛米，今朝却厭一匙膾。  
可憐執手牀頭別，屈指光陰倍黯然。

春雨

滴瀝愁聞暮復朝，坐穿木榻思無聊。  
尚餘朔氣留葭管，終待和風變柳條。  
花爲經寒含未吐，雪因帶雨落旋消。  
半生苦向忙中過，到得閒時轉寂寥。

汪見三新移溪亭書室次韻

迴廊窈窕碧欄斜，幌雲關面水涯。  
不用尋春頻繞樹，愛看倒影一池花。

崔羅門巷書常閒，獨許詩人數往還。  
留得弁園籽半面，屋邊流水樹頭山。

日暖銀塘散曉煙，好花如睡柳如眠。  
牀頭吹落殘書卷，

無那春風太放顛。

杜詩曉來急雨春風顛

春日陸匪莪侍御攜樽約諸老友同遊東園

爲憶名園好，經過不厭頻。  
山蹊行處熟，風景到來新。  
春動禽魚樂，林溪岫壑真。  
巾車何用駕，勝地是東鄰。

暫借精廬憩，峰西梵閣偏。  
爐煙飄翠樾，幡影落紅泉。  
邃壑閒僧得，藤牀醉客眠。  
自嫌心地雜，難入遠公禪。

發粟行

去年丁亥逢旱災，良田圻裂成荒萊。  
芋羹豆飯苦不給，

紛紛填壑真堪哀 聖慈蠲賑恩邁古詔下歡涌聲如  
雷江南歲漕減半額我州得留三萬石假令給散盡飢  
民何難立起溝中瘠無如鼠雀會分肥官吏交通恣侵  
食胥徒里長喜揚揚挨戶排門寫飢冊青錢入手始書  
名大半空名點鬼籍官符火急催租忙鞭笞流血盡成  
瘡大斛徵收小斛出強半已自歸私囊村民持票蹋城  
闕扶攜百里支官糧十日五日不得發忍飢垂橐仍還  
鄉空使黔婁盡僵路誰如汲黯便開倉即有窮民沾斗  
粟剋減餘存無好穀官侵踰萬吏累千無限奸豪各滿  
欲盡奪飢民餬口饘飽充若輩燃臍腹可憐賑富不賑  
貧官吏歡呼窮戶哭初聞 恩命盡欣欣千載遭逢堯



舜君竟使官糈餼饗餐  
詔書挂壁徒空文  
嗚呼笑民有苦向誰訴  
天門詆蕩何由聞

張汝貽招同諸友得月樓看梅

傑閣憑臨綺樹平  
紛披入眼亂瑤瓊  
初停宿雨如含露  
薄護輕雲略放晴  
華月未升香雪皎  
斜陽微照玉鱗明  
春愁黯黯方無那  
裁對名花意便傾

連朝微霰似絲飛  
勝引移期願不違  
美景漸迴寒乍減  
霜枝無恙雨偏肥  
杖藜客竝春風到  
夢草人逢花信歸  
慶餘新自蜀歸  
帶醉巡檐餘興健  
更穿竹徑覓芳菲  
訪懷先所居

送周序三廣文之官宿松

棲遲莫悵廣文寒  
觸目風波吏道難  
官興蕭疎宜薄俸

世塗荆棘羨閒官喜無案牘千重積况有雲山四面看  
贈策繞朝無別語臨行惟是祝加餐

喜張慶餘遠歸

元瑜書記自翩翩席帽輕衫躍錦韉鄉里看人嫌面目  
征途豁眼有山川去如重耳辭家日歸似蘇卿返國年

慶餘在外一十有九年

知是惠連頻入夢一樽重得話花前

同飲汝貽

樓上

江陰有劉伶墓按晉書本傳伶本沛國人何緣墓  
在江陰蓋流俗傳譌耳陸侍御匪莪有詩予亦戲  
和一首

五斗先生不愛醒何緣孤塚傍江汀阮嵇同散林間髮

賈郭閒看水上萍

酒德頌萬物擾擾若江海之載浮萍

惟有捧罌堪玩世

豈隨荷鋪便埋形猶嫌不葬陶家土化作人間盛酒餅

吳鄭泉臨卒曰必葬我陶家之側庶百歲後化而成土幸見取爲酒壺獲我心矣見吳志裴註

### 同王冰菴太守遊虎丘

新晴曉色照樓臺碧柳紅桃夾路栽紫玉香魂餘斷磧  
黃池霸氣冷沉沉灰當年花雨生公席異代風流短簿才  
別鎖蒼琅珍館闕三春留待 翠華來

嬾扶衰病歷孱顏不厭頻過是此山地爲人稠多點綴  
客因峰近好躋攀稍嫌遮眼朱樓迴獨愛憑欄翠陌閑  
偶駐蘭橈裁半日恩恩悔趁晚潮還

### 同憲尹步至虎丘後禪院觀玉蘭花

緣坡動流矚玉樹森百尺窺徑入禪扉幽芬襲几席婆  
娑一院陰照耀半巖白託根蒼藓林幸免劫火厄其初  
本一株喜若雷斧擘灼爍映講堂枝撐倚立石腹朽如  
空瓠幹挺如貞柏含如玉筍苞開如井蓮坼烏剝與蟲  
穿吐萼轉鮮澤不受游塵緇平鋪截肪壁朝光亂晴雲  
夜影蕩皓魄傳聞植宋代歷年凡五百訶護似有神就  
視敢輕摘年年看花人雜沓交履烏花枝逐歲新人生  
但如客花閱人往來更換猶傳驛吾儕各長年流光真  
可惜不知日後來復煩幾兩屐

寄題甫里先生祠

東南奧區稱笠澤交匯衆水流洄漩湖山環匝地靈秀

異代往往生名賢甫里先生挺唐季鬱林廉石家風傳  
從仕不屑蘇湖佐讀書獨遠春秋編維時有唐丁未造  
鳳鳥高逝鴉騰騫閹宦乘機竊魁柄強藩互噬紛戈鋌  
衣冠禍至竝焦爛皆由頭上貪貂蟬先生脫屣塵埃外  
宅邊讓水兼廉泉唱訓賴有皮從事筆牀茶竈相周旋  
曲池常養人言鴨釣艇時引槎頭編每愛茗芽出顧渚  
獨愁急雨沉湖田下視軒裳等糞土身超世網真神仙  
彼哉群小六臣輩如蛾赴火蠅逐羶豈若先生保明哲  
一竿投老江湖邊我昔扁舟過甫里漁村蟹舍環清川  
柳毅神祠日賽禱天隨遺跡空茫然近聞廟祀重整頓  
溪毛蒞藻能修虔清風亭子白蓮院不隨宿莽埋荒煙

先生有靈如可作我願相隨和扣舷

哀群盜

時南浙有大獄捕索妖僧一念甚急

化日舒長萬國春可憐蛾賊自亡身菜傭妄想分黃札

牧豎居然祿絳巾豈有泉鳩藏帝子虛傳海島應盧循

歐刀狼籍真無謂空使山棚客笑人

唐中岳寺僧圓淨結山棚勇士為亂

見唐書呂元膺傳

共道孤城漸合圍村坊白日駭旌旂但誇身手時無敵

誰料頭顱夜欲飛卉服臬袍裝鎧甲神鉦社鼓作軍威

紛紛結聚皆兒戲似戲何當觸禍機

雙鳳友人數舉詩會戲示四絕句

莫讀唐詩便賦詩拾來竹馬不堪騎水流花落春禽語

總是當前絕妙詞

無窮書卷總膏腴  
珍食尋求市上無  
餅肆漿家成底物  
給鮮須出大官廚

休將剽竊作生涯  
醞釀詩書氣自華  
譬似遊蜂採花去  
蜜成何處更尋花

顏謝才華並絕倫  
微分高亞只風神  
鏤金錯采非容易  
那及芙蓉映日新

病中對雨

重陰晝夜苦淒淒  
雲壓茅檐水拍堤  
一片沈波喧吠蛤  
五更長晦誤鳴雞  
牀牀屋漏頻移席  
處處牆傾半露棲  
彌望溝塍成巨浸  
行人誰辨路東西

身言金卷一  
一月都無兩日晴坐聽簷溜厭琤琮洪流忽訝憑空湧  
曦曜偏從何處明葉底涼蟬啞不語枝頭乾鵲寂無聲  
自憐懷抱長伊鬱帶霧蒙煙過此生

輓王隨菴先生

好學表遺老更勤松牖薛壁足清芬才名共擬鄭三絕  
翰札爭誇顧八分窮借文章消歲月閒將絹素寫煙雲  
眼前耆宿皆零落詩壘憑誰壯一軍

風流前輩是吾師樽酒招邀每不辭氣味祇因文字合  
追陪已恨暮年遲新篇初就頻相示舊學都忘愧質疑  
先生每讀書有疑輒手錄下問觴咏草堂裁幾日一生絕筆送春詩先生未病前數日讎集小齋分韻賦送春詩二章遂爲絕筆



題張慶餘煙舫集後

急裝縛袴日馳驅  
文檄常供十吏須  
幕府清秋詩興在  
休將書記比元瑜

北地沉雄南國清  
從來文士互譏評  
誰知江左風流客  
仍帶悲歌燕趙聲

山川極目覽神州  
漢寢唐陵禾黍秋  
銅狄淒涼家國恨  
可知平子善言愁

徒邊婦

有序

里中狂賊三十餘  
人以罪見法妻子皆徙極邊株  
送之日婦孺相攜慟  
哭過市路人皆哀之予爲作

詩

蕭何制法律婦女無嚴條獨有從夫刑死生無所逃哀  
此裙襦輩孽尤非已招失身落狂且飲博恣遊敖酒食  
偶見誘兒戲張旂旒豈知櫻重僂不保領與腰身既死  
都市家當徙并遼幸免門屋誅寬恩荷 聖朝生小不  
出門何由識邊徼一朝見收捕魄喪精魂消爺孃走相  
送牽袂羣號咷尚有懷中兒哺乳不忍拋亦有韶年婦  
纖步頗嬌媿背人揜面啼飛蓬首不膏仰呼蒼蒼天慟  
哭秋雲高縱使烏頭白無由返江臯律非陰訟輕罪異  
春橐勞遼水杳茫茫萬里程途遙雪花大如掌寒風利  
於刀骨向窮沙埋齒爲野火燒婦人豈預謀薄命隨所  
遭寧嫁窶人子食糠且舖糟禽鳥各有匹養雛得安巢

雙飛慎求偶勿逐獍與梟

秋感

隴畔疎蕪早輟耕一年無復望西成  
千家敗屋容船入四野涼雲共水平  
天外高風催雁陣樹頭寒雨壓蟬聲  
銀河傾瀉渾無極綿歷三時不肯晴

余與匪莪侍御同日病瘡戲簡

與君忝同年境遇異苦樂君齒甫踰艾  
精神正矍鑠吾衰亦已久鬢髮日凋落  
攝生勞逸殊願養豐儉各胡為  
八月朔痼疾並時作左傳註痼瘡也  
樂事獨我遺苦境若相約  
聞君染患輕瞥過無停泊惟余最沉綿  
憑陵恣威虐隔日脂髓按竟夕夢魂噩  
忽如墜層冰撼牀振鈴鐸忽如

陷爐炭著體沸煎灼陰陽遞乘除水火俄激薄吾聞爾  
瘡鬼祖父良不惡雖爲顛頊裔傲狠遭黜削中土不汝  
容瘴水潛棲託偏乘高秋時跳踉騁一脚頗懾柱史威  
欺余退叟弱炎涼類人情顧盼分前却吾將命符師丹  
篆勅收縛沃汝以桃湯東汝以葦索兩家各清安二豎  
逃冥漠同看中秋月舉杯對寥廓

戊子南闈榜發吾鄉竟無一人蓋從來所未有也

詩以歎之

秋雲漠漠黯鄉閭仙桂天邊望又虛充賦有期循故事  
策名無分上公車臨時眼暗三條燭平日塵封一束書  
孤負家人勞夢想寂寥依舊返窮廬

澶漫平沙出鉅公吾鄉文譽盛江東  
弁洲物望龍門峻復社交遊鶴蓋通  
地氣何曾移岸谷人材直是少英雄  
陳詩竟欲淪曹鄴殊媿泱泱大國風

次韻張蒿園病中作

襤被連朝朔氣侵窮冬蕭索轉難禁  
橫流吳地惟看水翹首秦天不雨金  
秦時雨金櫟陽歲月况當適盡日飛騰無復  
壯年心室中長物曾何有檢點猶餘挂壁琴

蕭蕭木葉早辭柯急景真如馬騫坡  
熱客怕逢飛蓋至窮交且喜杖藜過  
耳鳴不為勤勞得作勞耳鳴見晉書載記坐痺  
翻欣暇豫多人世彭殤竟何別雙丸跳轉自由他

匪莪招飲北廬次蒿園韻

十月霜風未入筵，輕雲淡日似春天。方池魚靜平涵月，老樹鴉棲暝帶煙。落葉半依苔砌積，野花多雜槿籬編。自慚小戶辭溪罰，酒味何知辨聖賢。

壽同年張春所學博

桂林同籍憶當年，才命相妨老鄭虔。得祿暫充博士席，到官仍泛孝廉船。巡檐雜草看雙檜，補屋牽蘿就一椽。回首燕臺甘息駕，蕭齋坐對各華顛。

詞賦聲華擅兩京，文章江左重張衡。好官自要爭年少，講席終須用老成。荒砌雨多蒼蘚合，春池水暖碧芹生。是非不到談經署，卿相長安看弈枰。

壽陸次公別駕

偶然鴻爪宦游蹤，早占青山烏目峰。  
翠黛放歸身蕭灑，緇僧留語坐從容。  
陶潛記裏秦人洞，秦系庭前晉代松。  
忽聽燕臺馳信至，風雷漸躍許淵龍。

朝衫久卸別鷓行，陸展猶然鬢未蒼。  
鶴背身輕步履便，龍鱗樹老歲華長。  
尚多酬應交游在，難免經營善事忙。  
不信春秋亞劉鄭，風流可入少年場。

香山七老會劉真鄭據皆年踰八十

佛日同胡馭洲，蒼期舍弟震侯集雪公禪室。

小橋通曲徑，幽賞入精藍。  
豆莢嘗新美，旗槍試茗甘。  
道風諸剎應，佛日老夫貪。

杜詩老夫貪貪佛日

若許從聽法，還來結

草菴

開河行

朝開河暮開河要令斥鹵回盤渦朝點夫暮點夫里胥  
追捕如亡逋當今 聖主仁如天濬河本爲利農田興

作兼存救荒計鳩工盡發水衡錢嗟此河夫多菜色晨

餒何能待日昃五月官錢半未頒爾有肉糜從爾食千

鋤萬錨聽鑿鼓三丈河身八尺土不辭露體遍塗泥可

奈淋頭逢凍雨樹上愁看逐婦鳩桑間已有催耕扈歷

久河工未告成農事匆忙漸旁午縱得青錢給一餐待

舖不救妻孥苦更遭官長日巡功筆撻疲民恣訶怒非

關民力怠工程自爲皇天不肯晴未看翠毯盈疇濶早

見紅榴照眼明尚作官身繫河上何時壠畔得歸耕昔

聞周夏兩名臣周文襄公忱夏忠靖公原吉疏濬川渠決滯埳遍從



水道訪曲折輕舟屏從泊河濱時入茅檐諮利病村農  
共許話艱辛澤被東南三百載到今功德未全湮嗚呼  
大賢久不作爾曹誰復知經綸今日河夫盡斃獨背似  
土牛耐鞭扑幾回持橐請官糧官糧早飽官胥腹重腿  
方憂疫癘生獨漉水淤泥又濁自是農夫性命輕誰能  
久候官倉粟但願功成早放歸急向田間叱黃犢

### 逐疫鬼

仍歲罹旱潦民物皆凋枯害氣蒸疫癘比戶遭毒痛蚩  
氓信機祥安問扁與盧謂逢梧丘鬼爭謁桑田巫巫言  
神譴怒性命在須臾賣我粟與布典我裳與襦亟往市  
酒肉人鬼恣啜舖送巫方出門已聞升屋呼猶言祈賽

遲神心終不愉不悟老巫詐惟咎失緩圖憐此一日禱  
早廢十畝租疑心畏瞰室眩目見張弧臺駘豈爲祟夔  
罔爾何需奔走譁伯有叫譟驚良夫豈真山鬼靈實由  
民俗愚吾聞神正直水早有禳雩索食嘔泄間此理誠  
已誣壽命乃由天運盡歸黃墟鬼豈能勝天天闕殲無  
辜詎無麴卿劾亦有長房符厲階首巫覡收縛投江湖  
游光及野仲惡鬼名見張衡東都賦次第行天誅桃湯遍灑濯葦  
索任鞭驅蒼生得妥帖萬物咸昭蘇

夏日雜言

雙丸迅景任推移又是恢台盛夏時樹底涼生風剪剪  
日邊雲過雨絲絲紅塵席帽馳驅罷清簟方牀坐臥宜

老去光陰須愛惜殘陽西下莫嫌遲

三徑蕭條斷往還不材只合任癡頑櫟生山曲終能老  
蘭植門邊恐被刪人世坦途無過拙貧家生計莫如慳  
廉泉讓水平安地消受餘生一味閒

喜雨

飢者思得食病者思得生兩年逢旱潦斗米如瑤瓊今  
年蒔種早仰望足香杭如何日杲杲值此一月晴禾苗  
雖未槁農夫已心驚亞旅半空腹採掘及蕪菁飢荒生  
癘疫輾轉纏疲氓甘雨倘後期良田應輟耕幸及六月  
杪豐隆忽發聲陽烏竟潛翳陰鳥已和鳴山雲旣樓起  
凍雨旋盆傾高下竝沾漑溪壑皆渟泓庶使飢腸慰亦

令病體輕定知倪清河殺犢陳孟觥

見三國志管輅傳裴註

喜聞

桔槔罷預想篝車盈何必束廣微祈禱通精誠及時膏  
潤足先秋枕簟清衰年寡嗜欲萬事了不營所急惟饘  
粥水旱頗關情霑澤賴蒼昊蠲租感 聖明一飽復何  
憂鼓腹歌昇平

題顧退山太史扁舟圖

吳中富山水隨處足遊賞自從官京師眯目憎塵埃月  
俸粟一囊未能飽廝養幾人到三公漫作青雲想一夕  
夢滄洲春風動蘭檣暫辭承明廬歸侍扶風帳吳山故  
青蒼吳水仍浩蕩山水如故人別來幸無恙黃篾一舟  
輕涼颺吹五兩綸垂帶笈筓橈舉鳴菰蔣散髮謝將迎

抽簪脫羈鞅，定知萬戶侯不敵五湖長。

客有句余致札當事者詩以曉之。

故人音問斷，雙魚羅雀閒。門久寂如時，貴難看油幕。面  
畏途防瞰，憤籠書見三國志崔琰傳裴註地幽自喜交遊少，性懶

從教官長疎，任是子公多。氣力寒灰何處借，吹噓

地從涼燠變，交情守分無。如百不營白髮蕭疎成，野老  
絳紗黯淡隔門生，性慵恥更通干謁，身隱人誰憶，姓名  
一自滄江高臥後，久無書札到公卿。

中秋夜無月

壯歲逢茲夕，高懷寄嘯歌。雲停吹玉管，月出漾金波。暮  
景歡娛少，深居寂寞多。本來無勝賞，閉影任姮娥。

抱灌軒秋興

我來當歲首細雨梅花寒時方積稜後民物皆凋殘臞  
頽顏都墨短褐身不完蕭寺行糜粥觸目爲辛酸今我  
復來斯桂枝發華丹禾菽被原野炊煙起林端木綿吐  
衣絮新杭足晨餐間閤得一飽我心有餘歡

雙鳳桂花歌

丹桂傳來天上種土物由來說雙鳳灌植家家各滿畦  
穠香郁烈秋風送遠近挈舟爲買花傾貲不惜金錢重  
別有虬枝偃蹇斜百歲根淡移不動花殘幾日墮芳茵  
瑟瑟珠璣委陌塵採香客到猶論價收來金粟每盈囷  
千杵春勺香不死雜珮纓囊巧製新當年舊族傳科第

意氣爭攀月宮桂，儒生宴罷鹿鳴歸。  
天香飄拂秋容麗，亭榭留賓競舉觴。  
氤氳花氣沾衣袂，只今嘉樹尚依然。  
人物凋殘風俗敝，池園荒涼蕢棗多。  
姮娥老去樹婆娑，仙根剝斷吳剛斧。  
吁嗟奈汝桂花何。

和周礫圃移居

何處無環堵，幡然別故居。  
殘書猶滿簾，家具不盈車。  
綠借鄰畦樹，青滋屋後蔬。  
王維南垞近，暫憩即吾廬。  
近水庵所居

庚寅元日齋中讀書

童稚游鄉校，歲紀庚寅年。  
今復逢茲歲，擘鏡憎華顛。  
仕學兩無成，流光忽徂遷。  
三載冬無雪，遍地生蟲蟻。  
遭逢

堯舜仁頻年井稅蠲昨夕布彤雲琪花舞遙天今朝喜  
微晴簷溜仍涓涓雪消疑澍雨日薄猶含煙其占爲豐  
稔農書古所傳災年幸忍過何愁食無饘閒門早謝客  
暫免塵累牽卷帙分左右千載得泝沿抽擇隨吾意菁  
英恣掇搦陳言未敢厭反覆乃益鮮追憶童冠時歷歷  
猶目前所苦雙眸暗臨書誤丹鉛神智似未耄聰明若  
可鞭譬如重鼓篋新硎試攻堅願師袁伯業餘生託殘  
編

問礫圃病

契闊經旬久知君尚臥疴吟懷猶似舊眠食近如何藥  
想隨時減花憐委地多牀頭留宿釀重待杖藜過



猛虎行

嗟爾南山白額虎  
吮血磨牙同貔豸  
橫行不畏卞莊來  
側目偏逢甯成怒  
舐啖山林百獸空  
虞人不敢施機弩  
負嵎憑險更誰撻  
尾如竿蠹閃雙睛  
哮闕一聲崖谷裂  
爪距忽展熊羆驚  
山下婦人空慟哭  
路中佞鬼解逢迎  
蕭條曠野無行跡  
食人猶肯留殘骨  
白晝頻看恣攫拏  
豈惟月黑憂塘突  
填腸滿腹心何極  
野兕山羊爭竄匿  
却訝如人仍著冠  
那堪怙勢還添翼  
雄視眈眈肆吞嚼  
憑威何日遭急縛  
短衣李廣尚騰傷  
挾矢裴旻終膽落  
嗚呼造物何不仁  
產此惡物戕生民  
入戶逢昆猶必噬  
攔道排門豈擇人  
麀場兔窟搜求盡  
愁殺西郊獨角麟

身言金卷十  
二  
為陳滄洲大  
守危之也

題李謚菴狀溪草堂圖

誰做王維畫居然白石涯雲牕延遠岫水檻替浮楂絮  
墮臨池柳籬通隔岸花江天放眼濶詩思入煙霞  
但喜披圖見無緣躡屐遊泉從冶父落渠合狀溪流留  
樹休添屋看雲更上樓風塵人競逐吾道在滄洲  
懶踏城衢路偏耽野興饒穿池通活水接屋當溪橋藻  
密魚爭聚花繁鳥競招好朋來二仲清酒正盈瓢  
標格山庭秀何當巖壑間脫冠便散誕坐石聽潺湲此  
地真堪老如公豈得閒他時猿鶴怨終恐掩雲關

東江詩鈔卷十

東江詩鈔卷第十一

太倉唐孫華實君橐

受業陸師巢雲編

春雨

黯淡過三月芳菲逐逝波  
春淡晴色少夢覺雨聲多  
零落憐花嶼青熒浸麥坡  
遙知隴畔水汎濫比秋河  
清曉臨書幌輕寒擁褐衣  
蕭閒覺晝永冷落放春歸  
鳩婦鳴相喚鶯雛濕不飛  
村廬應更好新水漫漁磯

同諸公集汪見三園亭

勝地頻招引春風歲有期  
人多前度客花似去年時  
露浥歆紅重煙淡暗綠滋  
晚涼仍徙倚正愛雨如絲

登臨容我輩卜築自前賢煙水空濛地風光淡澹天峰  
高猶自昔樹老不知年指點遺踪在依稀認輞川

即弁山故基

抱灌軒雨後喜周樂友胡馭洲至

城居厭喧聒偶此來村圃偏逢三日霖林色沉煙霧朝  
聞鳥聲歡風光生草樹陰雲漸解駁淡日始穿露新葉  
綠生香殘花紅尚仆夏氣換恢台芳春黯然度暫愜塵  
外蹤得散園中步幸逢二仲來清談豁心愴

村園月夜

樹靜風初斂林空月易生暝禽棲正寂露葉溼偏明燈  
火鄰廬影宵鐘遠寺聲悠然塵世外暫遣此心清

壽周礫圃八十

衰年苦索居老伴餘幾箇不嫌閔叔貧得蒙周黨過濁  
醪常共斟新詩亦時和憐君守章句時命每相左有屋  
補牽蘿無田種香粳身僅託雞棲力不任馬磨茅茨捲  
秋風溼煙蒸土銜曾聞昔名賢畢生遭坎軻商歌原憲  
寒霖雨子桑餓但留堅白存且免緇塵浣君心自恬愉  
志不因窮挫偃仰丈室中悠然天幕大新婦能共養稚  
孫自督課杖藜恣游行頗不耐安坐引滿過三爵談笑  
傾四座耳從昔年聾腰愁再拜箋音挫出禮記今年躋八十  
小疾因勞瘁幸免二豎催似有神明佐寒愛南榮曝涼  
便北牕臥已知四體和終期百祿荷賦詩陳短章聊當  
羊酒賀

婁江

一綫婁江阻百川東南旱潦已多年 九重自訪河渠

筴羣吏爭分內府錢淺溜可容巨觚入水門空有積沙

填只今白蜺湖橋路史記正義蘇州東南 早見黃泥擁

石田

疏瀹功成記夏周明夏忠靖公原 遍穿畛陌費咨諏當

年俱賴名臣力今日徒煩 聖主憂誰念窮黎勞畚鍤

但教黠吏算牙籌導河本自需賢哲肉食何知預遠謀

久旱酷熱立秋後一日得雨驟涼志喜

盛夏久不雨經月苦炎熇人愁鄭火焚禱想魯虺暴呼

嗟憫三農焦灼及九穀商飈引素秋光景變一宿雷聲

忽殷牆雲起俄成族初零似散埃少頃疑翻瀑皇天富  
膏乳轉吟滋滲漉甘霖浹禾苗餘潤沾蔬藪早起看庭  
樹老葉換新綠枕簟生微涼睡夢得清淑甦如出釜甑  
快若解桎梏雖未極滂沱諒各分霰霽造物本無私人  
苦不知足體似御風輕穗看迎霜熟二頃苟無憂長謠  
聊鼓腹

毛鶴汀招同諸公南園看黃葉

閒園蕭槭似村墟猶似吳江未落初長養輪囷因地僻  
掃除穠綠覺牕虛霜輕坐愛林容澹風定橫穿日影疎  
幸有高朋能載酒長年何用重增歎

古諺木葉落長年悲

城南水木舊清華烏柏經霜樹樹霞驚鳥未衝危葉墮

寒鴉猶戀夕陽斜，連蜷已老三秋桂。冷豔全勝二月花。  
虛館當年慚問字，一丘宿草憶侯芭。未句追傷熙載

吳歛為陳滄洲太守作

我行適吳會，散步城東隅。道旁數老叟，相聚羣嗟吁。問  
叟何所苦，言出涕淚俱。皆言太守去，誰與活笳孤。吾吳  
實皆窳，謬稱財賦區。民風競華靡，外充中固癯。太守躬  
儉約，牲魚絕庖廚。令行風偃草，誠感物自孚。屬吏知畏  
法，無敢輒恣睢。太守未來時，戈鋌伏萑苻。自從太守來，  
大澤無鳴狐。太守未來時，越勇擅相屠。自從太守來，椎  
埋散奸徒。吳俗好爭訟，投匭工詆誣。自從太守來，水蠹  
潛亡逋。吳俗尚飲博，繞牀叫梟盧。自從太守來，閭巷息



標捕吳俗喜淫祀靈談舞陳珠自從太守來祭賽斷妖  
巫前此府帖下遣吏督征輸太守緩征歛州縣稀尺符  
吏胥作蠹賊公帑任穿窬太守嫉奸蠹宿弊剗根株太  
守多微行清夜穿街衢競傳太守至滅燭掩門樞搖手  
相禁戒汝莫逞狂圖遂疑一太守化作百千軀白下昔  
罷官攀號沸通都徵拜起徒中歡呼溢吳趨忠信達上  
下撫軍實醇儒從容論民瘼指臂交相須生逢堯舜世  
永願歌含舖不知坐何事解組忽須臾跼廉夷則貪反  
覆何所無嬰兒奪慈母誰憐泣呱呱我聞父老言惆悵  
心煩紆安得百太守遍使窮民蘇一朝嘿嘿去叫天真  
無辜天門開詆蕩九閻或可呼誰能鳴諫鼓慷慨伏青

蒲終望太守還整頓起凋枯我言匪敢私聊足備吳歛

### 官倉

今年窪土半汙萊惟有高原存杭稌并賦常憂不足供  
 敢望私家餘二鬴俄傳府帖下徵糧稅長閭氓走旁午  
 月令曾聞較斗甬周官嘉量銘辭古民間出入尚須平  
 何况徵收自官府斛式製自崔中丞頒行實由元世祖  
至元間中丞崔或始製斛式口狹底廣至今用之不改 庶寬口窄有成規早禁淋  
 尖戒多取倉場斛多浮滿俗謂之林尖 此式遵行四百年一旦奸胥  
 敢變侮爭詫今年斛製新上下均平如甌甑斛面高堆  
 輒數升悉委倉夫操量鼓曲禮獻米者操量鼓孔疏鼓量器名東海樂浪人呼容十  
二斛者為鼓 胥使倉夫如使奴指麾總奉胥為主民間粒米

重於珠載向官倉賤如土  
早時賤價胥折乾盡剗窮民  
膏血補胥富全看金穀輕  
民窮甘受鞭笞苦狼籍倉場  
填淤泥穀飛眼見都成蠱  
穀之飛亦爲蠱見左傳  
可憐小戶闕晨炊  
破竈無煙轅空釜

歲暮方窘揆少司空自都門遣使餉金

寂寞林棲地窮陰歲暮天人方臥  
雨雪使忽到幽燕封裏金盈百間  
關路幾千門牆多少士寥落竟誰憐

冬日有憶

析居弟妹並艱難生事蕭條歲欲闌  
望我爲官仍偃蹇憐渠失路各飢寒  
勸酬長願歡顏共杜詩弟勸兄肥瘠  
誰能冷眼看激水西江那可待  
且分困粟續晨餐

寄題三賢祠

在泰山下祠宋孫復石介胡瑗

泗水流湯湯泰山高萃律地靈鍾至聖萬古開日月名  
教示隄防人倫樹圭臬微言雖久湮遺經資誦說所以  
後來者興起多英傑矯矯孫夫子山棲自怡悅春秋著  
發微大義得昭揭徂徠石先生函席叅諮決正氣觸奸  
回危辭奮筆舌聖人取狂狷此道未宜缺同時安定公  
師友相劇切十年不歸家俗累非所屑至今投書澗泉  
水自清冽三賢實鼎峙高風表截業誦法惟周孔許身  
並稷契運窮有退藏識定無緇涅講道尊聖經議禮恥  
綿蕪巖巖泰山阿清芬未歇絕康成有黌堂高朕祠石  
室三賢留遺蹤豈宜就埃滅江夏今儒宗詞源傾溟渤

持衡聖人鄉玉壺湛冰雪文章起積衰景行仰前烈謂  
此三君子才品各超越上溯先聖傳履道得門闌下開  
濂洛宗經涂示軌轍訓士先綱常植之在氣節任道貴  
高明三賢洵邦傑使之厠聖門詎慚兩廡列下教飭所  
司建祠枕山窟棟宇丹雘新茅薦蘋蘩潔爰俾魯諸生  
俎豆得時設清風激懦頑庶以俟來哲

汪見三招同諸公看花園亭

遲日招邀勝友同乍暄偏愛薄雲籠華筵漸減前年客  
艷蕊仍翻去歲叢碧樹暝含垂葉雨綠池吹縐落花風  
人偕春燕如期到常定尋芳三月中

嘉招每歲趁芳辰雨後林亭衆綠新寶砌丰茸驚五色

錦幃嬌冶殿三春何當綺席容衰老且賀名花得主人  
最有陸倕忙未了谿堂暫遣一抽身匪我後至

題宋葑洲太史出塞督運圖

聖人德化遍九埏薄海內外無烽煙忽聞公膺肆跳踉  
天子赫怒親臨邊臣僚相顧各蓄縮誰肯慷慨隨戎  
旃廣平太史本儒者請行獨在羣公先繫纓夙有終軍  
志授鉞曾無竇憲權帝命輓輸出中路車馳轂擊聲  
喧闐躍馬腰弓氣勇決急裝縛袴身輕便赤日或行身  
熱坂酸風或渡層氷川臨淡或入崢嶸壑登高或上差  
峩巔砂飛常苦塵眯目雨甚仍憂泥沒韉有時獨夜營  
門立刁斗無聲秋月圓回首家鄉渺何許聽殘蘆管不

成眠揚鞭一抹飛狐塞按轡頻過飲馬泉惟爾儲糈來  
獨早履危蹈險無稽延適當西路呼庚癸糧車忽到旗  
門前轉輸能濟將軍急膽略誰笑書生孱馬騰士飽各  
致力蛾賊一掃謳歌旋相門出將古亦有王式豈逐隨  
何肩唐名將王式宰  
相王起之子功成歸來仍袖手殿廬視草趨花  
磚傾身出赴艱難會忠貞世篤由家傳他日磨厓紀盛  
烈須君大筆銘燕然

題晉陽遺像

吾宗帝堯後分支有唐杜自宋質肅公苗裔遷南土移  
居鳳里始何年累葉衣冠不乏賢始從薄宦霑微祿後  
來科第仍蟬連父子相承兩御史繡斧威稜推直指鄉

黨爭誇世豸堂

晉陽堂名

榮華不羨鳴珂里群從翩翩多俊

英明經鄉舉各蜚聲謝氏封胡俱競爽王家養炬盡知

名此日休明逢盛世丹轂朱輪踵相繼子弟惟知課藝

文世途只解尊科第於今徒向畫圖看長身突兀惠文

冠年來耕鑿安時論當日威儀尚漢官鳳里荒涼堪歎

息四姓堂前總荆棘

郊唐周顧鳳里謂之四姓

吾宗猶幸守敦龐本

分生涯習耕織詩書雖已遜儒風稼穡猶無慚祖德巍

莪畫裏各簪紳清門為庶只長貧先朝賸有魏公笏老

輩仍看郭泰巾遺經一卷籤滕在繩武終須望後人

學山園紫藤歌

學山紫藤森十丈蟠根偃蹇虯龍狀爛熳花開穀雨天



誰數王家紫絲障靜異堂前翠幔張花時士女紛來往  
百寶攢成瓔珞裝千條倒掛流蘇帳清河兄弟盡能文  
四子聲華海內聞緇髻丹顏竝年少我亦差肩張一軍  
銜杯歡笑多名俊酒香花氣共氤氳綺樹懸燈添焰耀  
落英拂席每繽紛荏苒年光疾過鳥花枝如故人今老  
季子先鳴偏數竒諸兄失路同潦倒只今相次掩黃壚  
霜露淒涼悲宿草不材憐我尚全生恰似孤桐半枯槁  
學山臺榭總傾欹獨有名花似舊時當年同調人何在  
每到花前輒淚垂滋培百歲非容易勤囑東君好護持  
待看園林回氣象莫教風雨便離披

茗上張子宏輓詩

昔我先君子時推井大春書堂張講席五經自紛綸在  
遠走贄幣下帷茗湖濱維時明代末浙水未風塵居停  
有張氏族大盛親姻延迎請受業具禮肅主賓翩躚三  
學子頭角皆嶙峋精廬列文史饋饌羅肴珍晨牕細帙  
展宵檠函丈親季子年最少學藝日益新君家正饒樂  
儒冠比簪紳歲收數千斛紅粟常盈囷蠶桑餘羨利繅  
絲白於銀方期拾科第橫海躍竒鱗豈知兵火後家道  
逢遭迤訪我西湖上話舊含悲辛田疇多易主荒廬長  
荆榛賴有肘後方揀療頗如神先子昔尚在多君屢來  
詢先生伏勝老弟子原憲貧相對各如夢恍疑劫後身  
燈前一杯酒感歎還霑巾先子旣下世嗟君亦長淪通

門老兄弟繼見渺無因聞君有佳壻文行皆溫醇門楣  
幸有託半子情尤真因風寄哀辭庶代生芻陳

息廬詩

有序

予苦無書室辛卯秋乃於堂西隙地構屋兩楹至  
冬落成取陶淵明詩斯晨斯夕言息其廬之句顏  
曰息廬而紀之以詩

藤梢棘刺早芟除一室窳成苦蓋餘來日無多真逆旅  
此身現在是吾廬偶眠木榻宜清簟小憩藤牀當軟輿  
留得碧陰高覆屋桐花晝靜好攤書

馳驅塵土厭勞生身世從今百不營就繭已同蠶竝老  
壘巢恰比燕先成閒將無事當調養病費扶攜罷送迎

漸喜暄和春晝永雀羅寂寂掩柴荆

空庭初罷斧斤音簾閣悠然小院淡差喜眼前無俗物  
從他世上有機心室卑何用糊禿壤樹老猶能布綠陰  
近日光風看漸轉枝頭早已語春禽

老謝經營願息肩飢思一飽倦思眠髡絲禪榻消長日  
席帽征車憶往年微雨乍迎挑菜節淡晴已近放梅天  
莫嫌室小常妨帽也勝張融岸上船

庭前初種玉蘭一枝數日花放

階砌名葩市上移俄驚瓊片早離離含苞已喜風吹散  
綴玉曾無雨點緇玉蘭經雨即敗種樹暮年貪帶蕊看花老眼  
愛卑枝只今出檻剛三尺照坐搖光待幾時

客談維揚事有感

襜帷檠戟集揚州將謂根株次第接祇有蝸蟾喧永日  
曾無鷹隼擊高秋燒詞未肯窮梁獄泣玉翻憐作楚囚  
惟是餽牽將告竭柳隄錦纜尚淹留

重有感

孤寒何路望吹噓餘事文章直土苴按事莫循三尺法  
求名枉讀十年書鼠因憑社熏難入魚失吞舟網尚踈  
從此麻衣休再著好焚筆硯老樵漁

持衡浙水昔停鞍秋榜初懸列郡歡仕版策名誰宦達  
貧儒得路總艱難盈川一令憐楊炯翰院三年痛呂安

余所取士胡紹安呂葆中皆奇才胡仕縣令  
早夭呂及第三載而歿其餘名士物故甚多莫怪高貲

居上選從來寒士命多寒

贈曹浩修學博

東阿才筆擅風華偶過江城展絳紗海上秋風三頃稻  
檐前春雨一簾花同官恰喜逢鄉里攜室偏欣傍外家  
塵尾翛然簿領外絕勝打鼓報晨衙

鳴珂奕葉舊家聲小試儒官長一黷性為好閒宜仕隱  
瘦因病肺轉神清却公自愛登牀堦謂麓臺甯氏羣推應

宅甥

謂補亭

問字客來聊破寂籬邊花下有逢迎

鶯粟花

主人池館似山家爛熳階前錦被花

鶯粟一名錦被花

風裊柔

枝欺芍藥苞含香粒敵胡麻粟留影裏垂鞋重

鶯粟一名黃粟留

見詩疏

桑扈飛時拂檻斜長共虞姬墳上草年年春日鬪

鮮華

夏至日同朱文博吳符鄴小飲忽風雨驟至涼甚  
虛堂長日共飛觥莫厭貧家瓠葉羹急雨平銷三日暑  
涼風早送一陰生喜無熱客來衝酒幸有清言爲解醒  
遙想田間溝水足新秧千頃綠雲平

六月初一日初聞蟬聲

中庭有高樹葉密風颼颼新蟬忽試響翳影聞啾啾  
聲猶未高時作還復休蠕蠕尚未知即螿娘見爾雅且免搏攫  
憂嗟汝飲露腹嘐嘐復何求時至發微籟旁鳴豈自由  
周官考工記有以旁人皆憎此聲觸耳增鬱攸寒暑自  
鳴者鄭註蠲蜺屬

歲序於汝復何尤猶勝俗客談登堂滿伊優敢嫌此物  
聒轉覺吾廬幽

恭賀太原相公四十韻

神誕崧高秀光分昴宿精三台看續曜四葉實鍾英交  
讓盈朝陞歡呼溢里閤堂餐蒙賜饌鼎味待和羹觸石  
知雲起崇臺得柱擎公侯終復始喜起又重賡爰立符  
公望疇咨簡 聖情功名應丙魏家世本韋平憶昔神  
宗代遭逢國運亨夔龍時正滿金虎隙潛萌屹立清流  
幟誼諂國本爭先公秉鈞軸羣議正簧鳴拱默歸宸斷  
維持賴老成元良仍不改已豈訖無驚太史神僊質鴻  
文賈董名奉常推盛德鄉黨決仁聲耄老心彌肅崇高



志不盈孫謀傳孝謹僮約戢縱橫天姬揆籌應神光照  
社明槐庭滋舊翠蘭錡潤新榮累世儲祥久吾公應運  
生環階紛玉樹拔地一金莖志氣青霄鶴文章碧海鯨  
早年登蕊榜即日上蓬瀛校士持公鑒羣材服定評周  
防惟恪慎器度本淵泓密勿叅三事迴翔遍六卿爭先  
看捷足拾級但徐行遇合逢千載交字總一誠王商真  
漢相召奭實周楨世烈存遺笏先規凜鑿楹澄陂千頃  
濶廣厦萬間宏多士歸陶冶蒼生仰覆帔坦懷忘喜愠  
順運絕經營鄭驛賓常聚盧家瓠每烹誰知綸閣啓猶  
似翰林清相業曾孫繼興門盛事并登庸猶矍鑠後嗣  
况崢嶸泉石今如故池臺舊不更待公濟時了綠野得

逢迎

都憲揆公書來訊余近狀兼索所著詩文

羅雀閒門斷往還忽來遠訊扣柴關故人已在雲霄上  
往事追思夢寐間豈有離憂吟大澤更無撰錄貯名山  
叢殘敝帚留餘在幾度遲疑手自刪

頻煩書札慰沈淪誰似君侯氣誼真自愧衰殘成長物  
從來富貴易忘人

長門賦飲食樂而忘人

久知趙壹悲無用敢望

桓譚賞絕倫聞道金閨多著作何時刊布國門新

來書云公

餘偶暇習氣未忘時復濡毫弄墨

懷舊詩

有序

吾友朱廷一先生經苑康成人倫有道升伯起之

席庭筮三鱣折少府之鋒談推五鹿博物過於壯  
武多聞邁於胥臣直比朱絃曾無委曲瑩如白璧  
不染緇塵余誼參密戚居託比鄰游聚每在一堂  
往來不逾數武周黨之過從閔子止有清談慧曉  
之居竝張融皆臨流水何意日斜庚子歲戾己辰  
訪劉燾之居猶存老屋過斛斯之宅僅睹斷橋所  
幸韋氏經文皆傳令嗣中郎書籍不付他人先生  
子若孫並爲高才鴻生英英濟濟復有興者其在  
斯乎長君商求執義吾門而商求之子文博復館  
子家訓子兩孫蓋通門交好於今三世矣而子視  
息人間塊焉尚在聞山陽之笛淚灑陳根荅秣陵

之書事違幽壑撫今感昔爲之愴然因作詩三章  
以抒懷舊之思且以誌世好於不忘也

經術紛紛并大春鬚眉歷落見長身游如莊惠微言合  
情較劉盧世誼親山館藤花常縱飲寺門流水記芳鄰  
只今未契多年少誰比朱雲是故人

謝庭猶喜長蘭芽生小崢嶸頭角誇春雨閒園滋菜甲  
秋風客路踏槐花鑽窮蠹簡承先世荒盡菰田傍外家  
慚愧執經三十載曾無竒字授侯芭

此指商求

講帷暫屈課兒童方雅居然大父風聰悟那能晞少蓋  
少蓋到癡頑終恐是吳蒙詩書或望傳先業杖履差堪  
溉孫侍阿翁多感譚經常不倦宵分猶剪燭花紅

此指文博

夏日漫興

日長無事亦悠哉一飽無營萬念灰正欲分秧時雨至  
裁思舉扇好風來牆頭積潤多生草階砌逢霉遍上苔  
莫爲閒居愁執熱征鞍何限觸黃埃

每愁夏令轉恢台忽聽狂飈殷若雷聲撼屋山吹瓦落  
怒移滄海挾潮來飄蕭梧葉先秋隕狼籍花枝委地摧  
造物祇應憐老病一涼暫遣赤燥迴

旦起身輕便葛蕉晚來無計度炎熇百年光景催風燭  
一日精神異暮朝棊酒生平都不解坐眠長晝總難銷  
欲邀好友同清話直待涼秋對沆寥

驚飈裁過又驕陽杲日當空晝景長稍喜門閒多鳥雀

怕聞客至理衣裳人思解渴調冰水農說宜禾要熱湯

月令燒雞行  
水如以熱湯自是天行有常度更求何地占清涼

憶昔平津講席淹祗憑吟咏度朱炎泉聲月色多臨砌  
嵐影林光半入簾弟子已登霄漢迥先生仍就草間潛  
久知龍蠖皆前定古井無波心自恬

讀王抱翼小山詩集

瓊寶積瑤圃名材出鄧林我昔游京師同志合朋簪姜

查才最雄西溟  
夏重風標並敬欽湯吳矜綺麗西厓  
西齋霞裾異

織絳惠子善用少溪研惜墨常如金宮生慣用多堂怨累斛

傾竒琛而我愧黥淺異苔託同岑聯轡或朝詠刻燭多

宵吟有花輒共賞得酒無孤斟自從歸閭里曠隔如商

參獨倡無與和寂若秋蟬瘖疲暮逢王子蓬藿肯見尋  
三復小山詩知君用意深抗志必師古吐詞非諧今孤  
桐應律呂泠泠聞玉琴大雅久不作由茲暢元音如聆  
鸞鳳嘯蕩彼蠹蠹淫昔游各鄉縣蹤跡異飛沈今適同  
里閑時時得披襟斯文紹前哲非君諒誰任我老久衰  
退斂衽徒傾心努力期千載榮名非所欽

題蘇苞九進士濯足圖

秦川公子擅文章京雒多年跼舉場灰洞何人嫌溷濁  
涿北燕南之間塵土岔積  
謂之灰洞見范石湖集煙波有地自清涼芒屨久厭  
塵沙汙布韞曾憐道路忙賴是谿邊留釣石尚湖春水

即滄浪

重九後四日招王冰菴太守陸匪莪侍御王潞亭  
省曹周廷五孝廉吳紫眉明經飲菊花下

秋風動羣芳金菊方紛披人情競賞逐珍重比瓊枝城  
南賣花叟種花當耘耔朝治復暮灌搢搢常忘疲不惜  
半載勤趨此一月期我非抱甕人而又無場師不若竢  
其成盈擔野外移羅列茅齋中端坐翫華滋豪家貴名  
種重價傾金貲物尤不易購花開常苦遲賞愛貴目前  
芬芳須及時安能待歲晏凜冽對幽姿李娟及張態妝  
飾且隨宜何從訪傾城毛嬙與麗姬晉宮選長白亦各  
鬪蛾眉繁英照素壁燈影搖參差天氣適暄暖明月映  
簾帷花光正燦煜盃且莫辭寒風行悽戾衆卉日變



衰老至厭幽獨有酒思共持惟願常聚首年年醉東籬

題黃硯芝太史黃山採芝圖

黃山峭崿撐高空號爲天都帝所宮飛瀑倒懸白練影  
曾厓削出青芙蓉浮丘十里梅花路峭壁千尋石筍峰  
鍾爲人傑皆卓犖散作靈草多丰茸江夏先生神仙伯  
風標儼是餐霞客五雲瑞靄應臚傳一日聲名歟烜赫  
高情偶厭承明廬拂衣便躡阮溪屐聞道丹萸巖畔多  
朝暎耀采光翕絕何必黃精始療飢松根三秀長華滋  
始信峰頭石崩崩容成臺下路透迤手攜筠籠恣采擷  
科頭露紛風披披吾知圖畫聊爾耳赤松洪厓豈所期  
君不見當年四皓逃秦祿長揖漢皇義不辱先生遭際

值昌辰論道經帷資啓沃露嶂煙巒難久居駟馬高蓋

無傾覆

見四皓紫芝歌

直省重吟紅藥篇商山勿唱紫芝曲

東江詩鈔卷十一

東江詩鈔卷第十二

太倉唐孫華實君橐

受業陸

師巢雲編

題孫大承三峽品泉圖

尊人曾為什邡令

大蓬山下古侯封，今爲小邑方百里。  
白雲縹緲隔親闈，孫郎定省舟曾艤。  
蕭條廬井少人煙，落日西風弔雍齒。  
歸裝并少胡威絹，只有江泉味甘美。  
吾聞巴峽江驚急，幸遇澄泓平似砥。  
一葉扁舟破渺茫，兩岸層巒環剝崑。  
筆牀茶竈兩童攜，黃篾輕舠一箭駛。  
鏡裏清川綠可斟，船頭疊嶂青未已。  
中流自在片帆懸，浪細風柔吹不起。  
美酒何須載兩頭，石鼎颼颼聲入耳。  
一酌名泉兩腋輕。

虎跑中冷那可比却嗤陸羽是吳儂  
一生未啜巴江水  
送張萬園廣文之官宿遷

莫因俸薄感華顛絳帳風規要長年  
七錄共知家學在  
六經多藉老儒傳  
公田穡熟連車送  
淮水魚肥入饌鮮  
屈指歸艎候春渚  
故山猿鶴望君旋

送王葆光縣宰之官邵陽

槐鼎家聲尺五天  
暫分百里試鳴絃  
春風帆引雙飛槳  
秋雨人收再熟田  
吳都賦國稅再熟之  
稻今湖南田皆再熟  
杏苑才高輕俗吏  
桃源路近即神仙  
武陵桃源在邵陽  
高門自昔無卑宦  
轉瞬騫騰看九遷

紀異

郡縣城隍始何代載在祀典非淫私

城隍神始見北史慕容儼傳

有

司朝望必虔謁昭報恍惚通神祇水旱有禳疾有禱箒  
筵往往占憂疑廟貌穹崇傳自古層櫺曲折攢芝栴像  
設威尊踞高殿陰風髣髴吹靈旗姦徒惡子腹毒螫陽  
罰不及愁神知丹楹畫棟日增飾指顧便肯捐金貲浮  
屠老子各祠廟零墉碎甃誰撐支僧徒道人飢盡走淒  
涼壞壁縈蛛絲獨有城隍享豐樂有酒如淮肉如坻鄉  
里愚民最無識有病不解尋良醫惟憑巫覡恣幻惑典  
賣襦袴供牲犧祭禱方罷號臯復不悟無徵翻悔遲城  
隍祀事益繁盛朋妖扇孽誇靈竒紙錢委地每山積簫  
管歌舞無休時東西兩宮結徒黨不爭曲直爭盛衰一

神互自作讐敵老拳毒手相加遺蠻觸交戰怒未洩波  
翻瀾倒誰支持子尾自抽太廟桷李陽豈爲漚麻池磨  
刀礪刃入祠屋明神遍體成瘡痍泉臺妖蛇忽躩踞先

廟一日有大蛇蟠神像

毫社怪鳥呼出語不知何人夜縱火絳天

烈燄融風吹千年遺廟付灰燼飄墮鐵鳳摧梁恩氛侵  
何從詢慎竈失禮豈復同桓僖長吏瞠目噤不語欲按  
根祇知爲誰神焦鬼爛竟莫問父老創見皆嗟咨比來  
以神作嬉戲幾使正祀成淫祠一朝決裂事有漸皆由  
惡俗相傾危獨怪明神無顯報冥誅幽殛了不施豈若  
羅池柳侯廟醉侮旋能殺李儀見韓昌黎羅池廟碑早知木偶無  
靈爽紛紛巫史寧非癡吾願鄉黨各安戢毋舍民義崇

神達

神達昧其難覆言神道  
暗昧也見張平子賦

題彭南昉先生坐遊圖

南昉先生寰中仙直欲手拍洪厓肩  
早歲便吟思穎句一朝晞髮歸林泉  
先生林泉在何許葑溪之南城東偏  
上有盤鵬棲鶻之老樹下有眠鷗浴鷺之清川  
遠有雨鈴風鐸之塔影近有禾雲麥浪之平田  
幽蹊曲磴傳勝地一一輸獻吟牕前  
君不見湖川長史蘇子美滄浪花木何芊綿  
揮毫賸有三千首買地曾捐四萬錢  
又不見廣陵王子婆留後南園日夕張瓊筵  
碧瓦朱甍互照耀紅欄綠水爭華鮮  
文章富貴俱磨滅只有古木浮蒼煙  
先生宴坐默有會齊物早悟蒙莊篇  
綠緘腰章棄如土

東坡詩集卷之二  
三  
桃笙竹榻心悠然不用籃輿費扶舁何須柳粟煩攀緣  
翻嗤謝客遊計拙伐山刊木增喧闐臥遊坐遊總自得  
眺覽止隨心所便夜雪且迴剡曲棹春風常對舞雩天  
獨惜侯芭老無用百里信宿愁迤邐知有雲山在几席  
會應杖屨容周旋

哭毘陵座主宮諭楊公

奕葉承明舉世稀偏因羈宦苦思歸陽城木枕行囊薄  
方朔金門心事違常悔攜家愁旅食每因置酒典朝衣  
斗箕命值供揚簸空被山頭猿鶴譏

春風桃李自盈門函丈從容笑語溫侍直十年難避債  
乘輶二載已流言幸看子弟皆承寵頗訝生徒慣負恩



賸有戴崇憐尚在獨餘清淚灑陳根

臘梅

秋花零落剩空林忽訝幽芳點  
淡淡霜曉半庭翻磬口  
風前一笑展檀心何來寒玉雕  
蒸栗魏文帝論玉黃如蒸栗似向  
妝臺剪碎金纖手最憐煩揀擇  
斜穿絳縷上瑤簪

題黃研旅出塞圖

丈夫生不能如班仲升投筆從戎  
封萬里又不能如田  
子春仗劔前驅雪讐恥困守常如  
畫地牢鬱鬱胡爲久  
居此黃君倣儻更權竒目視九州  
同尺咫揚鞭遙指烏  
桓城攝衣直渡桑乾水款段常嗤  
馬少游縛袴思從傅  
介子鄉黨小兒羞比肩桐酒黃羊  
翻便美松杏山河舊

戰場白草茫茫弔殘壘崩緜三尺動隨身指顧天涯若  
比鄰可憐馮叟無窮恨終日關門對孺人

題程聖跂載花圖

高士多憐菊繽紛載滿航輕橈縈柳帶野徑入柴桑日  
煖千枝豔風吹一水香籬門傍溪竹稚子立斜陽

維揚寓中喜族弟薪禪待詔改堂太史序皇文學  
敷時孝廉同過

每向樓頭憶棣華論文蕭寺喜停車同懷何意岐千里  
名士難逢出一家夢裏常吟池畔草客中相對廣陵花  
勸酬幸得聯兄弟寥落行裝免怨嗟

薪禪改堂序皇時相過從各有新詩見贈詞翰並

美子感其意奉酬一首

吾宗溯自宋質肅子姓隨蹕因南遷大江左右東西浙  
垂條布葉皆綿延倫魁甲第姑勿道高文大筆推荆川  
中丞太僕竝千古金薤書成日月懸吾弟系出襄文後  
牙籤萬軸窮鑽研席帽風塵慳一第傾城不嫁空嬋娟  
詒我新詩日吟賞春風芍藥離情牽贈詩有云可惜離  
情拋芍藥留君難  
似挽留春淮海維揚多俊異吾家三鳳齊聯翩太史英年取  
上第鑾坡入直趨花墀竭來迎婦丞相府為吾師宛平  
公弟子婿  
旁觀爭羨秦樓僊生平恥問家人產珠衣寶帳隨雲煙  
只今家貧猶好客延我飲食陳芳鮮沈約詩篇任昉筆  
揮毫落紙人爭傳叔子權奇足競爽雲間一鶴看飛翥

愧我才非客兒匹如汝何曾遜阿連序皇贈詩有春草何當托惠連之句  
季子神情自沉默却說早占桂林先市駿已騰燕市價  
聞名競訪孝廉船我來蕪城值春暮屢開紅塵欲漲天  
增輝賴有花萼好竹房禪榻相周旋信知盛族唐堯後  
晉陽苗裔多名賢文章足敵金銀氣儒雅一洗錢刀羶  
憐子耄老尚為客一莊蕪廢南山田詩卷琳琅滿歸橐  
何用跨鶴十萬誇腰纏

壽沈台臣七十

沈郎二十作文賦赫翁才名起弱冠延陵祭酒賞君詩  
無異中郎重王粲太原相國昔相招下榻論文共宵旦  
授簡肯推枚叟先讀書早過表豹半擊盃揮毫五字成

四座驚嗟共傳玩秋風屢泛秣陵船朔雪嘗淹碣石館  
十年不嫁惜娉婷千首何人酬錦段頗有知交餉俸錢  
一杯那救湯年旱雖復遭回意氣存眉間神采猶精悍  
共憐老驥困黃埃却羨神駒歎赤汗到處常書白練裙  
自小能吟青玉案陸機入洛正英年公卿倒屣爭推讚  
三年雖染化衣塵一朝待縱凌霄翰老翁得此復何憂  
秋期會見門庭換愛君老學似表遺著述丹鉛不停腕  
少陵箋註豁群蒙曾註杜詩全唐甲乙憑點竄方選全唐詩道園  
自詡勝范楊如君不慚老吏斷虞集自許為漢廷老吏屈指交期  
歲月淡文酒追隨同里閑細看黃壚少故人與君鬢髮  
皆垂蒜君猶強健且加餐不用悲歌白石爛前屈後伸

理必然由來龍蠖非人算

讀韓致堯集

身世阽危事不堪孤臣銜淚灑天南  
沉湘有恨生無益賣國何人死尚慚  
造膝誰能容陸九撩鬚終是怕朱三  
美人香草皆離怨莫道香奩語太憨

寓揚州天寧寺同呂藻南李荆濤吳符鄴至寺後  
眺覽

偶趁春風泛短艤喜逢蕭寺綠陰遮  
門無過客尋修竹徑有閒僧掃落花  
放眼蒼茫看塔影憑欄晻曖見人家  
怪來窈窕多層宇應爲當年駐翠華

維揚程衣聞招同呂藻南李荆濤家弟薪禪改堂

壻吳符艸載酒遊平山堂登眺卽事

我來三月泊揚州蕭森古寺松門幽櫻桃花謝鶯欲老  
南陌未遂巾車遊幸有良朋解余趣招攜載酒登輕舟  
裁過紅橋心眼豁快意有若鷹離韝名園華館紛連屬  
隔林遙見繁花稠榜人揚舲瞥一過繫纜不得成淹留  
樹影低迷啼好鳥蘭橈宛轉隨輕鷗青絲挈瓶傾美醞  
瑠盤進食羅珍羞稍覺暄風吹醉面舍舟縱步聊夷猶  
平山咫尺得登憩願遊有志今方酬緬想嘉祐全盛日  
文章太守矜風流偶攜賓從恣讌賞觴咏盛事垂千秋  
堂中扁額遺筆在字大如斗雄且邁况有天章懸日月  
星河照耀虹光浮第五泉枯井已幕中泠水味何從求

遙望平原樹如薺隋宮泯滅成荒丘張吳二子竝名士  
張師孔  
吳煜吉傾蓋已喜情相投別烹香茗雜粧說詩論史  
真吾儔回船洗殘更深酌薄雲細雨風颼颼一日已當  
十日費主人厚意何綢繆旅客那能逢此樂曠蕩殊足  
銷煩憂却笑當年狂小杜不尋山水夢青樓

水底芙蓉和杜雲川太史

繁紅紛木末倒影入迴塘露洗臙脂溼池分綺繡香娉  
婷方映水綽約未經霜風起霞紋亂波明粉態光盈盈  
如欲語脉脉似相望對面休遙妬分身各試妝低顏窺  
曲渚薄醉立斜陽濯處疑成錦塞來漫作裳  
楚詞集芙蓉以爲裳  
駢枝爭下上一色並低昂莫遣飄零早長看水一方



哀吳振西進士

吾鄉延陵子矯矯獨角麟楊惲學史遷淵源蓋有因

振西

爲張西銘先生外孫

早讀等身書才華軼常倫謂是籛雲足蹴踏

驚騏驎豈知久蹭蹬不逢九方歎東書上長安愛才得

平津

爲太原相公賞重

荏苒踰五十始遊曲江春淹留未授官

編纂勞心神有婦不及訣遺挂悲安仁讀我贈行詩屢

和句益新

予昔年以長句四首送別君凡十六和

時時有書來念我起居

頻亦聞君善病書堂日長呻豈知青霞志修夜竟幽淪

吾觀夸毗子干名類非真行卷鑽貴要匍匐冒埃塵又

觀膏梁徒卷帙何曾親俄聞成名去揚揚擁朱輪嗟君

抱實學文行皆清淳薦士重侯喜掄材貴郤詵造物知

身言金卷之二  
何意天椽殲斯人世既妬君才天亦厭君貧才豐遇必  
嗇學富命乃屯銘旌書進士何補一生辛嗚呼命矣夫  
老淚空沾巾

陸麟度入京補官枉道過別

依然投牒上長安未改書生面目寒此去著鞭應得路

肯來紆軫問加餐絃歌豈爲謀三徑

陶淵明云聊欲弦歌以爲三徑之資

高韻原知薄一官民俗只今愁武健憑將儒雅起凋殘

萬授一編修視學黔中遣使致餽

牂牁南去邈天涯一札飛傳道路賒得士可能如盛覽

盛覽牂牁人從司馬相如作賦

發函恍似對侯芭高人豈問千金橐遠

意相隨萬里艤終是真儒明分義

授一精於經學

世情涼薄久

如紗

沈白淩自以與王永菴太守年皆踰七十而余與  
張蒿園廣文復叨十年之長因倣白少傅詩以四  
箇老人三百歲為起句見贈次韻奉酬

四箇老人

三百歲文章三老合推兄

謂蒿園永菴白淩

頽齡久

絕龍麗夢

來詩有渭老之句

逸興還尋鷗鷺盟敢為澗松徒歎

屈

用左太冲詠史詩意

幸同杜櫟得全生澤車款段優閑日鄉里

惟期善自名

陶詩庶以善自名

四箇老人三百歲誰為張丈與殷兄少年日久無前輩

老友心終念舊盟商皓尚嫌多一出榮期聊喜竊餘生

但須斗酒相娛樂誰顧悠悠世上名

送王冰菴太守之粵西兼東陳乾齋中丞

老去宜高臥君胡作遠遊家居原自好累重却多愁舟  
楫通灘水登臨憶柳州主人多暇日同上庾公樓  
幕府文章伯綸扉物望深戟門今日貴魏闕向來心轉  
盼三槐地迴翔八桂林素交驚會面一笑得知音

桃花始放連日爲風雨所損爲之悵然

城南初報曉霞新苦霧愁霖欲餞春天布重陰渾似夢  
花如薄命不逢辰枝枝帶溼疑濺淚片片沾泥浥路塵  
低首無言憐憫默祇應腸斷息夫人

息夫人廟里人  
號桃花夫人

王潞亭同年招飲觀劇

砥室疏牕洒埽新落花如雪草如茵性豪自喜窮珍味

量淺偏貪看醉人痛飲千巡沉井轄清歌百疊墜梁塵  
東華左掖多忙客爭及園林自在身

### 薪貴

枯藁漂沉萑葦無今年生計太疎蕪尺薪便足當尋桂

見張協詩如玉堪比束芻蔡氏豈能憐爨竹應生早已撒

屠蘇應璩與韋仲將書云屠蘇發可堪炷竈生薪濕遙

望村煙一縷孤詩印烘于炷註疏

### 竹籬新就列植薔薇即事有作

枳籬茆徑野人家擬看紅薔插架斜未碍綠芒能刺手

且培黃土待抽芽海中仙樹難成果藩落駢枝易著花

桃李曾栽了無益何如叢薄有繁華唐人刺主司詩云不栽桃李種薔薇

五弟震侯貧甚割田三十畝贈之戲題券尾

鷓巢燕壘半傾危  
弱女摧殘尚有兒  
寧忍兄肥看弟瘦  
豈令我飽任君飢  
謀生無過先儲穀  
求富何須羨販脂  
贈汝灤西三十畝  
好偕鄉里共舖糜

古語稱妻曰鄉里

官米行

去年霍潦歲不熟  
慄慄窮民在溝瀆  
詔書亟下有明  
恩蠲減田租兼發粟  
高檣大舩載米來  
胥徒里正歡相  
逐先時注冊報  
飢民烏有虛名登  
記錄至竟無從辨  
阿誰盈車滿擔歸  
私屋官米猶嫌飯  
有沙市上公然恣  
販鬻石米七百青  
銅錢貧戶無錢但  
瞪目得錢飲博競  
歌呼窮鄉寡婦哀  
哀哭官家本意活  
煢嫠徒使汝曹饜

酒肉汝奪飢民口內餐燃臍應照填脂腹

述古

讒口成鑠金沉舟由積羽蒼蠅正群飛白璧無完素臧  
倉沮孟軻伯寮翹子路正直枉者非妍好醜者妬芳蘭  
每見鉏實以當門故道義苟無讐特立何足懼由貪而  
跖廉毀譽每錯互孔光詆王嘉馬融排李固孔馬皆大  
儒物情常嚮慕一朝勢利奪顛倒迷好惡嗟爾名教人  
母令青史汙

苦雨

青熒陵陂麥候至爭抽芒及乎夏氣淡千畛同時黃農  
家仰早熟其功半稻梁去年罹水災埽地輸官倉田舍

無餘粒來甍庶可望婦子冀食新

左傳不食新矣謂新麥也

歡然得

充腸磨鑣待日出攢束齊登場奈何經旬雨晝夜驚淋

浪高者臥丘壠窪者沉渠塘眼看盡狼籍不得供餼糧

稽首籲天日願假十日光竟無一日晴天意誠難量

朝廷發官粟本為恤飢荒得粟誰最多蝨賊蝻蝗曾

不及飢民何由愬天閻我廩幸未罄裹飯念子桑獨飽

心內愧率育祈年康

### 三中丞詩

豫州擅中區和氣陰陽萃河洛貢苞符崧嶽蘊靈異故

多產名賢芳蕤播往記吾吳俗皆厥撫循需大吏屈指

三中丞皆出梁宋地

故禮部尚書湯公斌吏部尚書湯宋公攀今總督侍郎張公伯行



公實鳳麟一出爲時瑞讀書蘇門山脫略名與位學掇  
濂閩宗氣含曾閔粹秉鉞來江南誠求惟撫字愛民如  
乳哺聲色初不試頑獷皆革心豈曰憚猛驚淫祠一掃  
除山鬼斥非類正氣盪妖氛本教崇民義迄今民不忘  
談者猶拭淚宋公宰相門扶輿鍾間氣黃瓊練臺閣蘇  
頰備德器歷任典方州惠澤必霑被坐鎮資老成近人  
總平易條教初不煩鈴閣靜無事似無赫赫功萬物陰  
受賜政餘憩滄浪碧雲動詩思清池芰荷鮮曲榭花藥  
媚西陂足魚麥歸興縈夢寐公嘗屬子題西陂魚麥圖張公學道人  
根原辨義利方輪不解轉孤立行一意清水映冰壺屏  
絕絲粟餽大法自小廉墨吏心膽悸盡力驅猥獯百城

得軒睡騎虎與握蛇仁勇心不惴酒脯及糗糧悉自家  
鄉致惟飲吳江水每念吳民悴去職民哀號此涕豈容  
偽洞察賴 聖明百擠不一墜三公皆大賢中州稟淳  
懿歲星偏照吳半壁叨覆庇江左賴夷吾公等真無愧  
奮此直如筆千秋待公議

分所食米餉遺親族

去年遭大水禾稼皆漂淪我廩無贏餘庶接秋穀新顧  
視里中人謀食常艱辛米價幸未高顆粒已如珍來牟  
方銓艾靈雨復連旬苟無升斗米何以活枯鱗及物非  
我事且先急所親所親惟數家拙生同一倫罕聞煙火  
通陶淵明集  
煙火裁通羸臥風雨辰常念子桑餓苦無子敬困分

餉各數斗餐粥支夕晨我觀多藏室陳陳自相因親戚  
任顛踣邈若越與秦穀飛象爲蠱歲久化灰塵吝者常  
多財造物胡不均安得百萬斛散施遍飢貧熙然各安  
飽同爲鼓腹民我老且無力此志何由伸

詠錢

底物能爭造化權乾坤略具小方圓紫標插處誇連屋  
白水流時怕漏泉富比窟郎終自散見杜牧之詩才如趙壹  
却無緣可憐世上癡兒子心作緡繩抵死穿

人情擾擾逐青蚨來去無常轉瞬殊計算術惟工姍女  
夤緣權可買司徒幾家看守能三世到處奔忙爲五銖  
不見銅山曾許鑄著身依舊一簪無

長歌壽周樂友

丈夫何事不可爲君獨胡爲習經史正坐生平誤讀書  
佛鬱牢愁從此始如君本是不羈才弱冠文場名譽起  
踏遍槐花未見收秋髮毵毵垂兩耳旣不能經營什一  
致高貲身雜保傭坐塵市又不能十具耕牛二頃田搯  
搯泥塗抱耒耜澣洗終是累山妻蓬歷長慚對兒子于  
思于思可奈何顛顛烏爲困於此日糴太倉米五升夜  
誦緜囊書百紙有時揮灑動千言老將還堪一摩壘吾  
鄉習俗本輕儒只有錢刀雄閭里看君火色更鳶肩入  
口未應侵餓理大材自古多晚成會待時來拾青紫鵬  
鷗終橫碧落雲蛟龍不飲潢汙水從來壯士無暮年誰

謂先生今已矣君不見漢朝丞相公孫弘六十之年方  
牧豕

題新禪弟擊壺圖

吾宗俟齋弟磊落人中英二十飽經史詞藻紛縱橫遠  
游曾賦從軍樂授簡能令坐客驚索米未甘隨曼倩入  
貲猶自慚長卿只今宣髮已種種歎息常助秋蛩鳴試  
觀長安中高蓋擁輜駟世間多有安沒字

安沒字五代  
史安叔干

偏買科第影華纓嚮者微視君意色頗不平我今有一  
言可以解爾憤懣結轡之中情造物賦子有定分增此  
減彼如權衡豐汝文章嗇汝遇誰令汝生擅才名人心  
待足何時足毛銖敢與洪鈞爭君不見王處仲都督六

州控疆兵扣壺長吟心未厭惜哉狂豎徒驕盈達人所  
適無不樂失意何妨蓬累行何爲君心尚怫鬱請看婁  
江白髮兄榮途一染指卷懷返柴荆朝餐有麥飯夕膳  
惟菁羹井底波瀾長不起胸中塊礪何由生君今詩筆  
遠勝我遇雖稍阻道則亨君聞我言定一笑忽如萱蘇  
解煩醒撥棄吐壺不復打振履快作商歌聲

無鹽

貧家生計苦廉纖茹藿羹藜久不嫌枸醬何從來俊味  
芹菹略取點酸醎牢盆鏟利今垂盡竈戶侵漁日漸添  
始信坡公非妄語邇來三月竟無鹽

吳門道中

老來何事更相關  
來往煙波夢寐間  
夜半舟師暗理楫  
雞鳴月落過崑山

題金南廬工部所藏王石谷夏景圖

耕煙老人化工手  
層巒疊嶂工臨摹  
此圖畫水不畫石  
換筆更欲窮虛無  
煙樹平林接杳渺  
清泉曲岸交縈紆  
荷葉荷花香不斷  
紅衣翠蓋紛披敷  
翹立遙看松頂鶴  
翔嬉近愛洲邊鳧  
忽然傍水構傑閣  
涼風似覺來菰蒲  
中有兩人坐相對  
斯人無乃莊惠徒  
料應世事不挂口  
或論老易談黃虞  
狂飈不動波紋細  
輕舟蕩槳如乘桴  
葦間延緣漁子出  
舉網欲得松江鱸  
人間執熱知何限  
紅塵白汗爭馳驅  
此圖此景那易得  
空明一片涵冰壺

南廬先生秉遠抱身在魏闕心江湖風雅直追何水部  
仕途不羨漢金吾春暉堂中白日靜法書名畫供清娛  
閒曠時存濠濮想蒼茫似展瀟湘圖耕煙已老少真蹟  
毋使寒具輕沾汙能從細意出遠勢澄泓一碧如平鋪  
安得置身圖畫裏恍離熱坂遊清都

贈吳興郡丞高朗照

少年試郡想風稜檠戟家聲奕葉仍初政風流看柳惲  
重來賓佐得徐陵白蘋洲上瞻飛蓋紅藕香中聽采菱  
莫道蓬萊仙最後從來山水說吳興

見白樂天贈  
周湖州詩

揆總憲凱功輓詩

皎然玉樹見風神少小相於研席親幼學便精文選理



詩才肯讓建安人，姬姜自昔誰留吟。杯勺從來不入唇，久信生平斷三惑。却疑消渴病何因。

便殿同時對邇英。

予與凱功同日召試

羨君瞬息到公卿，護持氣

類憐文士屏絕苞苴荅。

聖明自厭紛華從，雅好獨餘

溫厚本詩情，千秋汗簡公。評在誅行當無愧，易名

賜謚文端

百尺尋橦自古危，彭殤同盡是前期。功名終始寧非福，

似續蕭條却可悲。虛寢竟無燕姁夢，繞堂祇欠衮師兒。

錦囊詩卷誰收拾，終望桓譚異代知。

清詩誰向草堂吟，人日偏傷掩玉琴。

聞以人日捐館

猶有高齋

舊賓客可憐，水磨好園林。

水磨地名

譚經久占劉瓛席。

瓛音桓

羈宦頻分鮑叔金，白髮滄江餘二老。

謂夏重與余

寢門哭罷

淚沾襟

贈徐觀卿太史

師門盛才俊濟美同荀陳五子竝擢第季也尤絕倫壯  
歲入翰苑居官裁二旬遽厭承明廬歸卜湖山鄰三公  
不挂眼萬卷常繞身箋疏窮抉擿吐詞必清新樽酒論  
文字經史每紛綸藝苑久榛蕪得遇井大春讀書過袁  
豹摘華邁崔駟旁通三乘義次律悟前因仰觀指星躔  
分野辨八垠羨君猶妙年講說極天人由此進不已安  
能測涯津吾師愛名士天實鑒其誠晚適償所好產此  
獨角麟昔者陳思王援筆如有神高譚古今際驚絕耶  
鄴淳疲暮逢郎君恍與子建親歐陽門下士窮作隴畝

民君獨時見憶不嫌樸且真幸無笑老耄八十多諄諄

諄諄如八九  
十者見左傳